



乾隆丙子鐫

文昌雜錄

雅雨堂藏板

文昌雜錄序

吾鄉漁洋先生最喜說部書遇一僻秘世所罕見者往往于友人許展轉借錄讐校評泊儲之池北書庫當時風流好事輝映朝野先生于康熙己巳服闋入都至辛巳四月請急歸里官京師十年之間曾撰居易錄一書凡官方遷擢政事因革逐日記載歎其見聞周悉可為史家取衷但未知其書體例創自何人及觀宋單父龐氏文昌雜錄始知先生倣懋賢之書而為之蓋池北書庫有此書也前輩撰一書必有所本其不苟作如此懋賢為丞相莊敏公籍之子元豐壬戌官主客郎中在省

此書所載官方遷擢事皆尚書省官不及他省書名文昌雜錄自當記之漁洋居易錄倣之誤矣

文昌雜錄序

吾鄉漁洋先生最喜說部書過一僻秘世所罕見者往往于友人許展轉借錄讐校評泊儲之池北書庫當時風流好事輝映朝野先生于康熙己巳服闋入都至辛巳四月請急歸里官京師十年之間曾撰居易錄一書凡官方遷擢政事因革逐日記載歎其見聞周悉可爲史家取衷但未知其書體例創自何人及觀宋單父龐氏文昌雜錄始知先生倣懋賢之書而爲之蓋池北書庫有此書也前輩撰一書必有所本其不苟作如此懋賢爲丞相莊敏公籍之子元豐壬戌官主客郎中在省

此書所載官方遷擢事皆
尚書省官不及他省書名
文昌雜錄自當記之漁洋
居易錄倣之誤矣

四年時官制初行記一時聞見及朝章典故頗可觀覽故先生稱爲說部之佳者此書刻本無多爲梓以行世懋賢名元英蠶尾集跋誤書文英當改正通典以尚書省乃文昌天府龐爲郎官記省中事故以名其書云乾隆丙子德州盧見曾撰

右文昌雜錄六卷龐元英懋賢之書也乾道丁亥夏留尹方公刊置建康郡齋懋賢丞相莊敏公之子元豐官制行入尚書爲主客郎醇懿有家法多識舊章援證同異穿貫今古當時大制作大典禮祲盛之容進退揖遜罔不與從事故其書事信其著論確觀者如班雲龍之庭而登羣玉之府昔太史公父子紬金鑽石室之書而世本戰國策楚莫春秋咸補舊聞之闕後之學者殆將有考於斯六月望左宣教郎新充樞密院編脩官衛傳書

文昌雜錄補遺

余記中書舍人禮上押角未詳何義按唐裴坦傳載令狐綯薦坦為知制誥裴休持不可不能奪故事舍人初詣省視事四丞相送之施一榻堂上壓角而坐坦見休重愧謝休嘖然曰此令狐丞相之舉休何力顧左右索肩輿出宋次道乃曰舍人上事必設紫褥於廷面北拜廳閣長立褥之東北隅謂之壓角宋丞相作掖垣叢誌亦不解其事未知何者為是

唐國子祭酒李涪作刊誤云兩省官上事日宰相臨焉上事者設牀几面南而坐判三道案宰相別施一牀連

上事官南坐於四隅謂之押角自常侍已下以南為上
 差牙相承實乖禮敬何不為丞相設位於眾官之南常
 侍諫議給事舍人循次而坐於丞相之下尊卑有序足
 以為儀由此觀之不獨中書舍人凡兩省官禮上宰相
 皆壓角也至五代馮道為宰相判狀尾罷之應目此閣
 長立於東北隅猶謂之押角如宋次道所記也

又五代會要晉天福五年三月勅中書門下
 五品已上於兩省上事宰臣押角之禮宜廢

余又記後唐同光三年洛京積善坊得古文錢曰得一
 元寶順天元寶史不載何代鑄此錢近見朝士王儀

家有錢氏錢譜云史思明再陷洛陽鑄得一錢賊黨以
 謂得一非佳號乃改順天蓋史思明所鑄錢也

余前記尚書省初拜並集都坐交禮遷又解交未詳其
 略曰漢制八坐及丞郎初拜官並集都坐交僕射八坐
 也又無不答之文又東宮舊事曰太子至承華門設位
 拜二傅二傅交禮畢不復登車又後漢養老儀天子與
 五更於門屏交禮即答拜詳此並以對拜為交禮遷日
 又集對拜而去謂之解交也

余前記唐諫議遺補在左右省而劉禹錫送令狐博士
 詩云諫院過時榮棣萼已有諫院之名何哉按會要貞

文昌雜錄 補遺
元中薛元與為諫議大夫奏云諫官所上封章事皆機
密每進一封兩省印署凡有封奏人且先知請別鑄諫
院印庶免漏泄乃知諫院之名舊矣

余自壬戌五月入省至乙丑八月罷每有所聞
見私用編錄歲月寢久不覺滋多官在儀曹粗
記故事今雜為六卷名曰文昌雜錄或有謬誤
覽者為校正焉

南安龐元英題

文昌雜錄卷第一

南安 龐元英 懋賢

元豐壬戌五月朔上御文德殿視朝仗衛如式既退三省已下職事官各釐新務蓋一時之榮遇也

初三日詔曰先王以道在天下列而爲事陳而爲法人各有分然後安官各有守然後治三代以降累世相仍寢迷本原遂亂名實餘弊斯積其流及今朕閱古弗還因時改造是正百職建復六聯先後重輕粗獲條次大小貴賤迭相維持差擇羣材分委成憲佇觀來効共致丕平敢有弗欽將底厥罪新除省臺寺監官詳定官制

所已著所掌職事如被選之人不循分守敢有僭紊其
申諭中外違是令者執政官委御史臺彈奏尚書已下
聽長官糾劾以聞詔自內出非學士之辭也

尚書省官左僕射王公珪右僕射蔡公確左丞蒲公宗
孟右丞王公安禮吏部尚書李清臣戶部尚書安燾四
曹闕吏部左選侍郎蘇頌右選侍郎何正臣尋出知潭
州除李承之戶部左曹侍郎陳安石右曹侍郎李定禮
部侍郎謝景温兵部侍郎許將刑部侍郎崔台符工部
侍郎熊本郎中員外互置不備員左司郎中吳雍右司
員外郎王震吏部郎中曾肇員外郎劉奉世司封員外

郎王祖道司勳郎中穆珣考功員外郎范岫蔡京戶部

郎中劉瑛員外郎黃好謙王陟臣馬琬度支員外郎陳

珣金部員外郎晁端彥倉部郎中韓正彥禮部郎中劉

贄員外郎王子韶祠部郎中趙令鑠主客郎中元英忝

冒馮膳部郎中魯有開兵部員外郎潘良噐職方員外

郎黃萃駕部郎中王欽臣庫部郎中林積刑部郎中胡

授杜紘都官員外郎韓宗良比部員外郎宇文昌齡司

門員外郎王諤工部郎中范子奇員外郎高遵惠屯田

員外郎張叙虞部員外郎李閱水部郎中李文卿未逾

月而兵部都官屯田三員外相繼以病卒於是杜常許

安世補兵部員外郎屯田闕六月勅吏部增員外郎一員除文及甫潞公之子也

主客所掌諸蕃東方有四其一曰高麗出於夫餘氏殷道衰弱箕子去之朝鮮是其地也在漢爲樂浪郡其二曰日本倭奴國也自以其國近日所出故改之其三曰渤海靺鞨本高麗之別種其四曰女貞渤海之別種西方有九其一曰夏國世有銀夏綏宥靜五州之地慶歷中冊命爲夏國其二曰董氈居青唐城與回鶻夏國于闐相接其三曰于闐西帶葱嶺與婆羅門接其四曰回鶻本匈奴別裔唐號回紇居甘沙西州其五曰龜茲住

居延城回鶻之別種其國主自稱師子王其六曰天竺舊名身毒亦曰摩伽陀又曰婆羅門其七曰瓜沙門漢燉煌故地其八曰伊州漢伊吾郡也其九曰西州本高昌國漢車師前王之地有高昌城取其地勢高人昌盛以爲名正觀中平其地爲西州南方十有五其一曰交趾本南越之地唐交州總管也其二曰渤泥在京都之西南大海中其三曰拂菻一名大秦在西海之北其四曰佳輦在廣州之南水行約四十萬里方至廣州其五曰真臘在海中本扶南之屬國也其六曰大食本波斯之別種在波斯國之西其人目深舉體皆黑其七曰占

城在真臘北其八曰三佛齊蓋南蠻之別種與占城爲鄰其九曰閩婆在大食之北其十曰丹流着在真臘西其十一曰陀羅離南荒之國也其十二曰大理在海南亦接川界其十三曰層檀東至海西至胡盧沒國南至霞勿檀國北至利吉蠻國其十四曰勿巡舟船順風泛海二十晝夜至層檀其十五曰俞盧和地在海南又有西南五蕃曰羅龍方張石凡五姓本漢牂柯郡之地又有荆湖路溪洞及邛部黎雅等蠻係北方曰契丹匈奴也別隸樞密院朝廷所以待遠人之禮甚厚皆著例錄付之有司而諸蕃入貢蓋亦無虛歲焉

尚書新省兵部未畢凡寓治四所一曰舊三司爲僕丞都堂而吏部戶部寓焉二曰舊司農寺戶部右曹寓焉三曰舊尚書省兵部刑部工部寓焉四曰三司使解舍禮部寓焉日給太官常膳湯茗薪炭有差

五月十二日左右僕射赴上於都堂是日郎中員外班迎僕射拜廳訖各判祥瑞等三案遂引學士兩省官賀於廳上御史中丞尚書已下百官班於廷中東西相向引僕射降階就褥位直省官贊朱衣吏引御史中丞出班北向躬致辭賀復位贊拜百官皆拜僕射答拜班退尚書省侍郎已上兩省給舍已上御史中丞學士皆

御賜寓百官就食幕次

七月勅職事官常膳許變料供應蓋異恩也

禮部王員外脩說文畢作進書表以示同舍僕因言前漢藝文志禪官之說亦自可用有一士人遽云富丞相曾用此故事衆人問如何乃曰貪以敗官一坐皆笑此與坊州取杜若無以異

祠部休假歲凡七十有六日元日寒食冬至各七日天慶節上元節同天聖節夏至先天節中元節下元節降聖節臘各三日立春人日中和節春分社清明上巳天祺節立夏端午天貺節初伏中伏立秋七夕末伏社秋分授衣重陽立冬各一日上中下旬各一日大忌十五小忌四而天慶夏至先天中元下元降聖臘皆前後一日後殿視事其日不坐立春春分立夏夏至立秋七夕秋分授衣立冬大忌前一日亦後殿坐餘假皆不坐百司休務焉

大忌日百官集於相國寺先至齋院左右巡使御史兩赤令夾街宰相過百官立班於庭中宰相揖訖方行香既畢御史臺知班復傳呼立班而朱衣吏乃曰相公傳語請不立班遂退百官見宰相故事皆廢獨此僅存焉禮部侍郎謝公言有一養珠法以今所作假珠擇光瑩

圓潤者取稍大蚌蛤以清水浸之伺其口開急以珠投之頻換清水夜置月中蚌蛤采月華玩此經兩秋即成真珠矣

詳定禮文所言古者神民不雜禮刑異制故治禮之官常得以治禮事神之官常得以事神如左氏所謂使名姓之後率舊典者爲之宗自漢以來治禮事神之官不得其職始雜以他官故後漢志太尉掌郊祀亞獻光祿掌三獻太尉秦漢用以掌兵今爲三公坐論道者也光祿本掌宮殿門戶皆非祠官之任勅今後南北郊執政官爲初獻禮部尚書侍郎爲亞獻太常少卿爲終獻諸

祠祭禮部尚書侍郎太常卿迭爲初獻太常少卿禮部祠部郎中員外郎爲亞獻太常博士爲終獻宗廟親王宗室使相節度使爲初獻宗室正任以上爲亞獻終獻若南郊宗廟即戶部兵部隨所用牲以尚書侍郎薦徹腥熟如常祀即戶部兵部郎中員外郎薦徹文宣王以國子祭酒司業丞博士爲三獻武成王以祭酒司業爲初獻亞獻終獻自如故事差官中祠即禮部祠部郎中員外郎爲初亞獻太常博士爲終獻小祠即禮部祠部郎中員外郎與太常博士牙差一獻祭馬者四皆以太僕卿少七祀皆以太廟令爲獻官焉

七月五日迎氣西郊六日孟享太廟皆當差工部郎中薦徹而工部乃輪差水部郎中攝事既授誓於尚書省有司舉紕方改差工部員外郎不預誓成直赴祠所監祭使卻之彈劾以聞

祠部歲比天下僧尼道士凡二十四萬然死者亦常萬人按杜牧杭州南亭記文宗語宰相曰古者三人共食一農人今加兵佛一農人乃爲五人所食武宗會昌五年出四御史按行天下凡除寺四千六百僧尼并女冠二十六萬五百蓋自有唐以來數常如此何其盛哉

中書丞相蔡公太夫人康寧門下侍郎章公尊親以通議大夫致仕戶部尚書安公具慶重茵列鼎可以言榮養矣

凡三省官假日唯接見賓客不許出謁新制也

七月二十八日以國史成曲宴於垂拱殿兩省給舍以上尚書省侍郎已上學士御史中丞觀察使並赴奏教坊樂酒七行皆供御杏仁蓋非常例也

禮部王員外言今謂面油爲玉龍膏太宗皇帝始合此藥以白玉碾龍合子貯之因以名焉又云昔於孫四皓家得七寶簾數尺皆以七寶縱橫編綴工巧不可名言也

右屯衛將軍孫守彬家富於財置酒模於明德坊常有四老人飲其上俗有四皓之名

禮部劉郎中莘老言昔年鄆州進士李矩赴公試問同人李演云堯舜如何可以對天地否演對云似此疑惑事切不可用聞者無不大噱

余昔知安州見時丙推官言羅愷初及第鄭獬在翰林以詩賀之愷以公狀爲謝具位詩一篇右伏蒙尊慈特有寵惠感荷之至但切下情鄭云賴此詩不是公用都下莫不傳以爲笑也

八月壬子文德殿宣制授皇子彰武軍節度使開府儀同三司進封延安郡王昭容朱氏進位賢妃三省及在京應職事官皆赴班集寄祿官不與焉

三佛齋注輦國朝貢見延和殿引至柱外跪撒金蓮花真珠龍腦於御坐前謂之撒殿初至闕先具陳請詔方許之

新定儀制宰相兩省侍郎尚書左右丞皆朱衣吏兩人雙引樞密院官紫衣吏一人前導御史中丞知雜御史亦朱衣吏兩人雙引尚書侍郎學士待制兩省給舍及太平大夫已上並朱衣吏一人引膳部魯郎中言昔知萬州南山甚秀去城三十里遠望如婦人簪花之狀州

文獻通考卷一百一十一
中謂之真女石登山視之即一石甬上有紫荊一枝州
中女子至七八十不嫁者夫死義不再行蓋有真女之
風焉

禮部王員外言昔在金陵有一士子爲魚鯁所苦累日
不能飲食忽見賣白錫者因買食之頓覺無恙然後知
錫能治魚鯁也後見孫真人書已有此方矣余知安州
有鼎州通判柳應辰爲余傳治魚鯁法以倒流水半盞
先問其人使之應吸其氣入水中面東誦元亨利貞七
遍吸氣入水飲少許即差亦嘗試之甚驗

禮部謝侍郎言乾山藥法刮去皮以厚紙裹掛於風中
最良又置焙籠中下鋪茅數寸以微火烘之亦佳作湯
點如新者乳香最難研先置壁罅中曰許入鉢乃不粘
祠部趙郎中亦云研乳香取指甲三兩片置鉢中尤易
末爾

考功蔡員外超授起居郎其季卞方爲右史兄弟並直
螭堦士林竦美焉

舊三司勾院井泉最苦熙寧中三司火始引金水河注
省中去井差近未逾年遂爲甘泉名著都下品第一因
知水脉流通者無不甘冽云

元微之詩云松門待制應全遠藥樹監搜可得知蓋有

唐宣政殿爲正衙殿廷東西有四松松下待制官立班之地舊圖至今猶存

按開成元年正月詔以入閣日次對官班退立於東階松樹下須宰臣奏事畢齊至香案前各言本司事雖紫宸殿亦有松樹爲待對官立位六殿門外有藥樹監察御史監搜之位云在焉唐制百官入宮殿門必搜監察所掌也太和元年詔曰自魏晉以降參用霸制虛儀搜索因習尚存朕方推表大信寘人心腹况吾台宰又何間焉自今已後坐朝衆寮旣退宰臣復進奏事其監搜宜停

戶部王員外言元昆駕部郎中比自長安歸攜藥樹數株至京師其葉葱翠可愛于今關右頗多人罕識者漢制以侍中執虎子禮部王員外因讀西京雜記云漢朝以玉爲虎子以爲便器使侍中執之行幸以從又知虎子以玉爲之也

李廣獵于冥山之北射虎斷其髑髏以爲枕示服猛也又鑄銅象形爲溲器示厭服之故謂之虎子云

禮部劉郎中借東京記云相國寺前有公子亭臨汴水

大中祥符七年徙近西北直景靈宮即魏公子無忌勝
槩之地也天清寺繁臺梁孝王常按歌吹臺阮公詩云
駕言發魏都南向望吹臺簫管有遺音梁王安在哉後
有繁氏居其側里人呼為繁臺芳林園太宗在藩邸特
賜其地為園或傳周世宗時已為園太祖自陳橋入京
駐於此范質等謁見焉開寶寺上方院即夷門山院有
唐令狐綯讀書堂初令狐楚鎮宣武綯隨侍讀書於此
後復為節度使圖像今不復存也

膳部魯郎中言昔年陳州有女妖自云孔大娘每昏夜
於鼓腔中與人語言尤知未來事時故相晏元獻公守
陳方製小辭一闋修改未定而孔大娘已能歌矣又何
怪也

九月一日法酒庫內酒坊詣內東門進新酒遂以頒近
臣有差前數日膳部光祿寺皆嘗酒舉舊例也詔吏部
增員外郎一員以豐稷充而稷以昨任臺官曾彈奏執
政乞辭新命許之刑部增二員以韓晉卿為郎中莫君
陳為員外郎以呂和卿為考功員外郎補蔡京闕未幾
胡援卒

禮部王員外言崔豹古今注蛺蝶大者名鳳子然辭人
罕用余讀唐韓偓詩有鶯兒啞啞雌黃紫鳳子輕盈膩

滿希密即麥罕獸德之異譯
大食人多以此為名

粉腰正為蝶也西京雜記漢武帝過李夫人以玉簪搔
頭自授^後宮中搔頭皆以玉玉搔頭之名起於此
余奉使北遼至松子嶺舊例互置酒行三時方窮臘坐
上有北京壓沙梨冰凍不可食接伴使邪律筠取冷水
浸良久冰皆外結已而敲去梨已融釋自爾凡所攜柑
橘之類皆用此法味即如故也

余本部掌朝貢錄見至道中大食國滿希密遣男進貢
云彼國但出犀象詔問以何法可取對云象用象媒誘
致以繩漸羈縛之犀則使人卧大樹操弓矢伺其至射
而殺之其小者不須弓矢亦可捕獲于闐國城之東有

白玉河西有綠玉河次西有烏玉河其源同出崑崙山
在其國西千三百餘里每歲至七八月水小之後取玉
於河謂之撈玉閣婆國方言謂真珠為沒爹蝦囉謂牙
為家凌謂玳瑁為家囉謂香為崑燉盧麻謂犀為低密
云
今歲時人家作餠蜜油煎花果之類蓋亦舊矣楚辭招
魂云糗糒蜜餌有餠餠此糗糒以蜜和米麩煎熬餠餠
餠也中書趙舍人云方言餌餠也今餠餠是

禮部王員外言昔見朝議大夫李冠卿說揚州所居堂
前杏一窠極大花多而不實適有一媒姥見如此笑謂

文獻齋金卷一
家人曰來春與嫁了此杏冬深忽攜酒一樽來云是婚
家撞門酒索處子裙一腰繫杏上已而奠酒辭祝再三
家人莫不笑之至來春此杏結子無數江淮亦多有嫁
橋法不知是何術也

兵部杜員外言今關中有白蕤械樸也芄芄叢生民家
多採作薪且言煙與他木異嘗取試之其煙上直如線
高五七丈不絕詩所謂薪之槩之物雖微可以升燎於
上帝亦蘋蘩蒹藻之謂邪

禮部謝侍郎因誦杜甫詩五夜漏聲催曉箭坐客言午
夜子夜之義如何余因言顏之推家訓或問一夜何故
五更更何所訓答曰漢魏以來謂爲甲夜乙夜丙夜丁
夜戊夜又云一鼓二鼓三鼓四鼓五鼓亦云一更二更
三更四更五更皆以五爲節西都賦亦云衛以嚴更之
署所以爾者假令正月建寅斗柄夕則指寅曉則指午
矣自寅至午凡歷五辰冬夏之月雖復長短參差辰間
遼濶盈不至六縮不至四進退常在五者之間更歷也
故曰五更午夜子夜之義蓋亦如此

九月以工部郎中范子奇充陝西轉運使邊事畢如故
以知湖州唐淑問爲吏部員外郎是月曾肇以憂去官
禮部謝侍郎言昨以諫議大夫知潭州歲正月家人迎

文昌雜錄卷第一
紫姑神爲戲是時官制未頒陞改之名莫有知者家人戲問紫姑將來遷何官乃畫地作太中字了不詳所以明年遂改太中大夫唐義問家事紫姑最靈在京南問得何差遣寫京西轉運四字已而果除京西轉運判官何其異邪

劉敬叔異苑曰紫姑本人家妾爲大婦所妬正月十五日感激而死故世人作其形於廁以迎之

文昌雜錄卷第一

文昌雜錄卷第二

南安 龐元英 懋賢

十月以天章閣待制王克臣爲工部侍郎熊本知桂州故也以水部郎中李文卿爲司門郎中以司門員外郎王諤爲水部員外郎以曾伉爲吏部員外郎以太僕少卿吳安持爲駕部郎中仍專總牧租券馬事

尚書省凡六曹二十四司除告身帳目外一百六十八案吏額一千四十三人總五月六月文書一十二萬三千五百餘件天下之事莫不上於尚書宜其多之如此也

余讀唐會要貞觀十五年太祖遣新州刺史高表仁持節至倭國古倭奴國也在新羅東南居大海中表仁浮海數月方至自云路經地獄之門親見其上氣色蒼鬱又聞號叫鎚鍛之聲甚可畏懼世之言地獄者多矣信非妄邪

二十日國忌相國寺行香同集金部晁員外問殿上鴟吻義如何余因言唐開元十五年七月四日震興教門兩鴟吻攔檻及柱災蘇冕駮曰東海有魚虬尾似鴟因以爲名噴浪則降雨漢柘梁殿災越巫上厭勝之法及大起建章宮遂設鴟魚之像於屋脊又畫藻井於梁上用厭火祥今呼之爲鴟吻豈不謬哉鴟尾之說蓋如此駕部王郎中言唐李肇國史補云宰相相謂爲堂老及元載與常袞唱和詩有堂老之稱信李肇之不妄也禮部王員外因問唐宰相宿直否余言唐制宰相每日一人宿直開元二年姚崇爲紫微令崇年位已高時亦違其直次所由吏數持直簿詣之崇題其簿曰告直令史遣去又來必欲取人有同司命老人年事終不擬當諸官歡笑不復逼以直十一年停宰相宿直見會要此其證也

景靈宮神御殿成榜名皆上親製宣祖曰天元后殿曰

太姑^始太祖曰皇武后殿曰儷極太宗曰大定后殿曰輝
德真宗曰熙文后殿曰衍慶仁宗曰美成后殿曰繼仁
英宗曰治隆將以十一月五日奉安丞相執政官分充
禮儀使仗衛如式

未鈔本玉

禮部王員外因言和詩最為難唯唐賢尤工於此賈至
早朝大明宮曰銀燭朝天紫陌長禁城春色曉蒼蒼千
條弱柳垂青瑣百轉流鶯遶建章劔珮聲隨赤墀步衣
冠氣染御爐香共沐恩波鳳池裏終朝染翰侍君王王
維和云絳幘雞人送曉籌尚衣方進翠雲裘九天閭闔
開宮殿萬國衣冠拜冕旒日色纔臨仙掌動香煙欲傍
袞龍浮朝罷須裁五色詔佩聲歸向鳳池頭杜甫和云
五夜漏聲催曉箭九重春色醉仙桃旌旗日煖龍蛇動
宮殿風微燕雀高朝罷香烟攜滿袖詩成珠玉在揮毫
欲知世掌絲綸美池上於今有鳳毛三篇皆用鳳池事
唯工部尤出於二公昨建三省待漏院書此詩為屏風
焉

鈔本仗

三省樞密院皆執政官一人脩時政記按唐永徽已後
左右史唯得對仗承旨^仗伏下已後謀議皆不叅聞文昌
左丞姚璹以為帝王謨訓不可遂無記述若不宣自宰
相即史官疎遠無得而書之遂表請仗下所言軍國政

督鈔本都

要即宰相一人撰錄號爲時政記自璿始也

二十四司郎官各輪當本曹宿直凡假日若直夜四部文書皆得施行而用當直郎官印按唐故事除吏兵部外共用督省印至大歷二年二月九日初備文昌臺二十四司印本司郎官主之歸則收於家建中三年左丞趙涓始令納於直廳其假日及不入日即用當直郎官本司印餘印都不開此亦前事之比也

具鈔本共

余讀江南錄正孟陽有賦名嘗夢有一官人延入一第中具飲其傍几上有書一卷孟陽因展讀謂曰斯乃吾所述賦藁何至茲乎其人曰昔公焚之時吾得之矣孟陽因就求之答曰他日若至衡山必當奉還後官至衡州茶陵令乞致仕卒於衡州今世言焚故書必毀而後燔之蓋可信也

禮部謝侍郎言嘗遊廬山天池菩薩崖夜至亭上其下數十仞忽見兩燈閃閃相去數里許俄而燈自下而上漸傍崖口直外亭上數丈復下至崖分數星而散禮部王員外亦言昔見劉定說曾至此崖夜半白烟起於崖中既明如水中月影滉漾不定彼人云現銀色世界顏之推所謂千里寶幢百由旬座化成淨土踊生妙塔豈虛語哉

御史臺言文德視朝儀兵部侍郎與吏部侍郎東西相向對立搢笏出班簿置笏上蓋因唐制武選在兵部今吏部左選掌文官右選掌武官請今後視朝以吏部左右選侍郎分立殿廷詔可

禮部謝侍郎言昔有一軍校與趙韓王同甲月日時亦同韓王每遷拜此校亦略有轉補或大有錫賚亦須薄有霑賜然韓王微疾此校必劇病或薄謫必大受笞辱福常輕而災常重豈君子小人理固如此邪抑亦偶然邪

薛鈔本後

鈔本脫郎中侍郎以下二十二字判六廷判云云

御史中丞知雜事禮上祥瑞案三道皆判記詔不見出何故事駕部王郎中云詔亦詔之義如尚書省案式郎中侍郎判六詔名示之類記未詳余以謂尚書省案式至尚書亦曰依判詔注非通僕射判者不須詔至僕射但書依判而已然則記詔者恐是應記詔於上也亦未知果是否

鹵簿內阜燻蓋旄頭之遺象光武紀漢官儀曰舊選羽林為旄頭被髮先驅魏文帝列異傳曰秦文公時梓樹化為牛以騎擊之騎不勝或墮地髻解被髮牛畏之入水故秦因是置旄頭騎使先驅旄頭之遺象蓋如此十一月四日午時四刻殿中細仗金吾旗幡僧道威儀

教坊樂奉引列聖神御自天章閣出晨暉門赴集英殿
 上步出集英門每神御步至右承天門奉迎至慈聖光
 獻太皇太后上雨泣前導於時日景晏溫皆以謂恭孝
 所感初五日鸞駕儀衛太常鼓吹凡四千人奉引赴景
 靈宮上步出宣德門上香再拜仍却拜褥初六日車駕
 詣宮行朝謁之禮至繼仁殿上出小次悲哽酌獻畢號
 慟久之在列莫不悽愴是日微有雲物前此芝產天元
 殿拱初八日宰相率百官詣東上閣門奉表稱賀故禮
 部王員外表辭云考宮之日靈芝秀於虹梁薦鬯之辰
 慶雲承於玉宇用此事也初八日文德殿宣赦文應神
 御殿繪像文武臣僚與子孫一人初品官績功臣之後
 聖澤無窮公卿之家何以爲報耶

十三日以原廟奉安禮成宴百官於紫宸殿酒九關

關經陳長文章仲將許允皆傳受此法允初拜鎮北將

軍以印不善使更刻之如此者三允曰印雖始成而已

被辱問送印者果懷之而墜於廁又有鷹經鶴經牛經

馬經今公卿家亦頗有此本

工部王侍郎言昔與先兄同官河內嘗借親書劉夢得

集四冊後不復見還今尚在否余歸索於書橐中果有

劉集一部細書小楷末有印記克臣二字侍郎名也因

此下接卷三
第六葉第
一行

以還之凡四十五年復歸王氏侍郎且言二十歲寫此書今七十年矣不惟不能復寫小字遠視亦已不見又可慨然也

工部范郎中出古畫一軸云是韓滉筆其畫作村夫子教學生夫子帶烏紗折上巾按僕頭起於周武帝蓋取便於軍容至唐始有巾子兩帶以繫巾兩帶垂以爲飾至僖宗時因伶人以銀線撚二帶帝曰亦與朕作一頂來自此方應折上後又以木刻頭圍裁烏紗爲之所謂與我所一軍容頭之類是也方韓滉時未有此製恐非韓畫諸君皆以爲然

二月以金部員外郎晁端彥爲郎中以大理正賈種民爲吏部員外郎門下駁還改駕部員外郎

國朝故事誕聖節前兩月譯經院開堂宰相領潤文使叅知政事一員同潤文至日執政皆赴中使

張文昌寒食內宴詩云朝光瑞氣滿宮樓綵燾魚龍四面稠廊下御厨分冷食殿前香騎逐飛球千官盡醉猶教坐百戲皆呈未放休共喜拜恩侵夜出金吾不敢問行由有唐禁烟節亦宴百官廊下皆冷食又知夜慈多至夜而罷也

禮賓使管勾麟府路軍馬公事張世矩上言昨夏國稔

此上三十一行乃下卷錯葉

夜慈疑內宴之祀鈔本亦作慈

惡用師討蕩臣隨王中正出界行十餘程其夜苦寒被
堅假寐而府州靈佑秦王見夢於臣言荷朝廷禡祭及
御香之賜故來助戰若聞樂聲即是凱旋之兆及破宥
州將校皆聞金石之音俄奉詔班師乞賜嘉號以答神
休勅特封靈佑應順秦王秦王竟未知何神貺蠻之應
亦可以言聰直矣

潞國文公守太尉皇弟雍王曹王守司空鄭國富公濟
陽曹郡王皆守司徒三公官備近世未有也

十二月以著作佐郎林希爲禮部郎中以范百祿爲司
門郎中以知建州王彭爲刑部郎中

鈔本彭

禮部王員外言前知制誥李大臨西川人有門人背偃
不能仰視一日因藥市罷見一道士云秀才有錢丐一
二百爲酒資此書生云家貧無錢所居有薄釀同一醉
可乎道士欣然便往酒半道士問何故背偃書生言不
幸得此疾無如之何道士因出藥三十粒云來日五更
面東以新汲水下覺微燥不足怪書生如所教旣服藥
燥不可勝展轉於榻上亦甚悔之然每一伸縮漸覺舒
便比明身已直矣蜀人重藥市蓋常有神仙之遇焉

余表弟靳庠自河東來言石州定胡縣有趙相公廟神
每降言災福事如嬰兒狀韓公絳知太原府經畧司勾

當公事張姓忘其名欲議毀此廟韓遣往視之既至祠下忽自空中飛莢盞一隻至香爐前自碎飛上張面血流不已張恐懼再拜而去劉永年病遣子焚香八兩已而神降云尊君無恙行且入朝矣劉疾果愈未數月召爲步軍副都指揮使何其異邪

十六日都省覆王韶已下謚議左僕射王公式假右僕射蔡公服藥傳宣名召左僕射赴省左丞對席右丞獨坐于西偏尚書侍郎郎中員外分左右曹東西各重行考功郎中監儀御史坐北向酒九行僕射秉筆有司贊揖頂筆故事廢矣

儀鈔本儀

禮部林郎中言大門年三十五累舉未登科忽夢詣卜肆布卦甚久曰秀才及第晚須在五十一已後來年詔下固無所望已而五十一人解送五十二人過省五十三人及第冥兆之前定如此邪

兵部杜員外言前年使熙河五月二十六日至岷州界黑松林寒甚換綿衣毛褐絮帽乃可過每歲四月七月常大雪三二尺至是林雪猶未消非目睹未必信然也禮部王員外言登州有嘉鱣魚皮厚於羊味勝鱸鰕至春乃盛他處則無鰩魚亦出此州石決明是也褚彥回傳江南一枚直數千錢蓋重北地所有也余昔通判滑

州見太守光祿卿解賓王說登州每晴霽烟霧中有城
闕樓閣人物車馬鷄犬往來之狀彼人謂之海市禮部
作詩送王袞出守東牟用嘉鯉故事因為余話海市與
解光祿同

十九日國忌景靈宮輝德殿行香三省樞密院導從皆
不得入殿門捧香合用閣門祇候八員從新勅也

國朝會要爆稍爆擊聲也一云象爆牛善鬪字從牛唐
金吾將軍執之今制如節有袋上加碧油□□□置朝

堂車駕鹵簿出則八枚前導又四枚夾金吾大將軍者
名衛司爆稍音少府監欲修爆稍不知其制禮官曰爆

稍棒也以黃金塗末執之以扈蹕余昔為三司勾當公

事嘗至儀仗庫季點見舊爆爆稍末刻牛以黃金飾之
隋書大業元年三品已上給胸炮藥用瓜炮脾之胸玉篇亦

作蒲交反未知孰是

余昔知安州見荆湘人家多以草竹為卜楚辭云索瓊

茅以筵筵算兮命靈氛為余卜之其注曰瓊茅靈草筵小

破竹楚人名結草折竹而卜曰筵靈氛古明占吉凶者

蓋因遺俗之舊也

監察御史王柏言每國忌相國寺行香左右巡使與兩
赤令相對立班俟宰相過揖訖退今國忌並赴景靈宮

胸當作胸炮當作炮

音當作音鈔本不誤

王柏鈔本

行香集百官方儼恪以奉祖宗見宰相私禮謂宜寢罷
勅特依夾街故事廢矣

二十八日臘前一日祭太社太稷質明御香不到監祭
使以聞勅改用次日國朝以火德王故戌日臘建隆中
禮官議唐正觀已前寅日蜡百神郊日祭社稷辰日饗
宗廟非古也請三祭同用戌臘一日近儀酉日祭社稷
蜡百神戌日饗宗廟杜臺卿引禮運云仲尼與於蜡賓
鄭康成曰蜡亦祭宗廟時孔子仕魯在助祭之中明自
古以蜡日祭廟也

漢舊儀曰顓頊氏有三子生而亡去為疫鬼一居江水
是為虎一居若水是為罔兩蠱鬼一居人宮室區隅漚
廋善驚人小兒今歲暮大儺謂之逐疫是也

二十九日大慶殿習元會儀與輦御馬皆在龍墀上新
制也

文昌雜錄卷第二

文昌雜錄卷第三

南安 龐元英 懋賢

上御大慶殿會朝始用新儀開大慶門張旗幟兵部設黃麾仗五千人夾門填街太僕列五輅殿中省輿輦織扇又復故事陳天下貢物百官冠服分為七等皆有司新製不佩劍不脫屨烏中書侍郎押方鎮表案中書令讀給事中押祥瑞表案門下侍郎讀戶部尚書奏諸州貢物請付所司禮部尚書奏諸蕃貢物請付所司太史奏雲物祥瑞光祿卿請乞羣臣上壽既畢延王公升殿百官就坐酒三行罷所司承旨放仗舊儀宰臣兩省學

元豐癸亥正月元旦此八字當補

鈔本請

士待制至殿中侍御史先就丹墀位乘輿升御座方引諸司三品四品入大慶偏門正安之樂作按李德裕兩朝獻替錄云每遇正至與兩省官侍立香案兩邊終朝會無拜賀之禮嘗奏請自今且立香案南候扇開贊拜再拜出班致辭賀又再拜訖分香案東西侍立乃知唐儀丹墀祇是兩省供奉官侍立之地宰相一員攝太尉與一品二品三品四品列于殿門樂作就位蓋官架之樂本爲上公今元會新儀百官就位皇帝升坐禮官乃引宰相親王使相押文武三品等官分東西門入正安之樂作雖刊正謬誤而兩省供奉官猶班賀于丹墀未復侍立之制詳定所上朝會儀注二卷令式四十卷其詳密如此然恐尚有未至者焉

元會門下侍郎奏祥瑞故事但讀有司所上名數今方用表禮部林郎中撰其辭曰聖人出而四海清帝命昭而萬靈集必致諸福之物以表太平之符伏惟皇帝陛下體堯之仁躬舜之孝力行勤儉而本以化物誠意惻怛而出於愛民是以指揮之間功業成就覆燾之內陰陽協和蒙被羣生旣浹肌膚而淪骨髓函濡異類遂霑動植而洽飛翔仰而觀者景星慶雲俯而視者醴泉甘露扶疎偉曄是爲嘉禾朱草三秀之英游泳服馴則有

赤鴈白麟一角之異謂宜作爲聲詩而奏於郊廟深詔
太史而著之簡編以示無疆之休以昭特起之蹟考諸
已往固可謂絕世之殊祥抑而弗宣猶以爲盛德之餘
事自時所紀殆不絕書今者駕鸞輅以充明庭撞黃鍾
而御太極典禮大備物容一新萬方駿奔重譯輻湊於
是自昔辮髮卉裳羈縻之所未至踰沙軼漠言語之所
未通咸奉玉帛而介九賓襲衣冠而獻萬壽烜威赫德
冠古超今巍巍煌煌傳示無極鋪張王會之衆美哀對
皇家之盛儀臣等恭率有司伏尋故事稽參圖牒宜先
象齒之珍敷道句臚敢上龍墀之奏歡呼抃蹈倍萬常
情表旣出羣公莫不傳寫焉

唐諫議大夫拾遺補闕皆在省太官局屬光祿寺而劉
禹錫送令狐博士詩諫院過時榮棣萼張文昌寒食內
宴詩廊下御厨分冷食已有諫院御厨之名其故何哉
初二日謁左僕射因言仁宗朝作新玉輅旣成與舊輅
同呈於宗政殿舊輅在後忽有大聲隱隱如海獸狀仁
宗訝之乃令新輅在後遂無聲旣出殿門舊輅復在後
又有大聲如前吏部蘇侍郎云此輅唐高宗顯慶年造
製作極工歷五代至皇朝今在太僕寺
勅景靈宮朝獻正月以十一日四月擇日七月以中元

十月以下元原廟之禮蓋用孟月焉
初十日立春賜三省官采勝各有差謝于紫宸殿門杜
臺卿說正月七日爲人日家家翦綵或縷金薄爲人以
帖屏風亦戴之頭鬢今世多刻爲華勝像瑞圖金勝之
形引釋名華象草木華也勝言人形容止等一人著之
則勝又引賈充李夫人典誠曰每見時人月旦花勝交
相遺與謂正月旦也今俗用立春日亦近之然公卿家
尤重此日莫不鏤金刻繒加飾珠翠或以金銀窮極工
巧交相遺問焉

余昔年隨侍至定武見總管廳有唐段文昌撰平淮西
碑石甚大不知何因而至此地也

鴻臚陳大卿言昔使高麗行大海中水深碧色常以鐵
碣長繩沉水中爲候深及三十托已上舟方可行旣而
覺水色黃白舟人驚號已泊沙上水纔深八托凡一晝
夜忽大風方得出去日五晝夜至高麗境上回日七晝
夜方至定海風浪每散乃作浪花袞然赤色夜見海中
如火龍無數不知涯際甚可怖也
以駕部郎中王欽臣爲陝西轉運副使

唐歲時節物元日則有屠蘇酒五辛盤咬牙錫人日則
有煎餅上元則有絲籠二月二日則有迎富貴果子三

月三日則有饅人寒食則有假花鷄毬饅鷄子子推蒸餅錫粥四月八日則有饅糜五月五日則有百索糴子夏至則有結杏子七月七日則有金針織女臺乞巧果子八月一日則有點炙杖子九月九日則有茱萸菊花酒饅臘日則有口脂面藥澡豆立春則有綵勝鷄燕生菜今歲時遺問略同但饅糜結杏子點炙杖子今不行爾杜甫春日詩云春日春盤細生菜又曰勝裏金花巧耐寒重陽詩云茱萸賜朝士臘日詩云口脂面藥隨恩澤如此之類甚多略槩舉記當時所重也

夏英公家有阜綾標六典一部唐舊本也雖宋宣獻李

邯鄲家藏書爲多亦無此本嘗問其孫朝請大夫伯孫書在何處云昨分書云不知誰院得之計已散失殊可惜也

工部王侍郎言昔年通判壽州知州光祿卿林洙因鼓角匠入州衙爲盜被傷而卒後一日其家女僕附語云召簽判呂水部既至云某不幸且死敢以後事爲托某之死非此兵之過宜問有公案五道要其照驗呂因問大卿附語使某何以爲信乃曰但看架上衣可知非妄家人遽往視之見一淺色汗衫素未經着血痕滿襟又曰此非血某之淚爾家人以錢送佛寺撞鐘至五更鐘

竟不鳴又何怪也前此太白近月太史言南方主將不利未幾洙死焉

禮部林郎中言昔年為禮官以朝命至豫章祭小龍既至祠下行禮之日數見異鱗皆金色口有火燄自梁棟間墜于祝歐陽生之肩遂入石合又舉首蜿蜒于花板間既而聳身直上高三五尺執事之人無不見者還朝亦圖上其事云

唐淑問前知宣州以避親嫌與集賢校理知湖州陳侗對移唐自湖州召為吏部員外郎以疾乞補外復授宣州代陳還朝近時未有如此之比也

此下九行乃上卷錯葉

晏元獻家有相笏經占吉凶十可八九昔有相印

缺行罷教坊已下支賜凡絹一千一百餘疋錢四百餘千紅錦一端銀椀十四口用正旦例也

以禮部侍郎謝景溫依前通議大夫知洪州以翰林侍講學士黃履為禮部尚書以右司員外郎王震為起居舍人以禮部郎中劉摯為右司郎中司門郎中李父卿出知晉州以考功員外郎范岫提點府界諸縣鎮公事冬至假七日前後各三日宰相宅引百司釐務初包拯為三司使上言每節假七日廢事頗多請令後祇給假五日自此始也舊儀宰相五鼓早朝朱衣吏不引午後

前後各三日據文義當作前後各一日此與卷一祠部休假條義異案鈔本作一日不誤

鈔本作云不誤

鈔本注

鈔本伴工有接字

以上十九行乃上卷錯葉

歸第方引假日遲明始赴中書朱衣吏自私第前導故謂之宅引六

淳化元年命正言直史館宋鎬右正言直史館王世則使交州黎相既至相令數十人扛大蛇長數丈饋於使館且曰若能食此當活之為饌以獻又羈送二虎以備縱觀外國之俗其陋惡乃至於爾邪

余奉使北遼過順州有黍谷坊伴副使王仲淵指以謂副使文供備云觀此可知其寒也劉向別傳曰燕地谷美而寒不生五穀鄒子吹律召溫氣至五穀生至今名黍谷北遼士子多燕人故亦頗知學問也

賜筵尤為盛集呂許公王沂公與羣公唱和詩刻石堂壁官制既行以禮部尚書兼譯經潤文宰相與執政官猶同赴開堂之會焉

禮部王員外言京師貴家多以醑醪漬酒獨有芬香而已近年方以榎櫨花懸酒中不惟馥郁可愛又能使酒味辛冽始於戚里外人蓋所未知也

戶部馬員外言藩鎮之雄盛莫如吉州有解玉鑽真珠脩琵琶行他處未見此比余昔知安州步石村種薑芋凡四十里城南有梔子村花開如瓊林香聞數十里他處亦無

禮部林郎中言兵部許侍郎昔爲翰林學士忽夢著綠心甚惡之未幾奪職以起居舍人知蘄州然未見著綠之應官制旣行改朝散郎本階正合衣綠方悟前夢之可信也

太常寺言四時大祠自天地日月九宮貴神五帝其祝皆進書臣名謂宜如唐故事天地稱臣日月已下皆進祝書名禮部議曰天子父天母地兄日姊月禮故宜有降請如太常所議

太常博士何洵直言春秋仲月朝拜諸陵於太常寺輪官一員餘並以吏部待次升朝官充攝謹按漢制丞相

以四時行園重如此唐顯慶中以太常卿少行陵事重人輕乃詔三公行事太常爲副率皆乘輅車備鹵簿謂之公卿巡陵令謂宜太常寺輪卿少外其餘差門下書尚書省清望官仍乞重脩春秋仲月遣官拜陵儀薦牙盤食訖應須灑掃及芟薙脩治皆隨事處分勅朝拜諸陵輪太常卿少外餘並以宗室遥郡防禦史充焉

二十二日遷寓治尚書都省入新省就令廳賜省官已下御筵至都省守當官已上六曹書令史已上分坐兩廊遣入內供奉官劉瑗排辦及勾當翰林御厨儀鸞內臣分總諸司差教坊第四部一百五十人酒九行果肴

皆非常比再坐賜花內出金器遣御樂院近侍各傳宣勸酒至暮方罷羣臣慶親逢之幸莫不感恩霑醉焉

元豐五年七月始命皇城使慶州團練使宋用臣建尚書新省在大內之西廢殿前等三班以其地興造凡三千一百餘間都省在前總五百四十二間中曰令廳一百五十九門間東曰左僕射廳九十六間次左丞廳五十五間次左司郎中廳二十間次員外郎廳二十間西曰右僕射廳九十六間次右丞廳五十五間次右司郎中廳二十間次員外郎廳二十間其後分列六曹每曹四百二十間東南曰吏部尚書廳在中六十四間次侍郎

廳四十間其東曰郎中廳四十九間次員外郎廳三十

四間後曰司勳郎中廳三十四間次員外郎廳三十四

間其西曰司封郎中廳四十九間次員外郎廳三十四

間後曰考功郎中廳三十四間次員外郎廳三十四間

其北曰戶部度支金部倉部在焉又其北曰禮部祠部

主客膳部在焉西南曰兵部職方駕部庫部在焉其北

曰刑部都官比部司門在焉又其北曰工部屯田虞部

水部在焉並如吏部之制厨在都省之南東西一百間

華麗壯觀蓋國朝官府未有如此之比也

太常博士何洵直言看詳舊禮太祀前七日平明太尉

誓百官於尚書省近制親祠南郊明堂太廟掌誓戒用
左僕射闕即用右僕射以刑部尚書一員涖之今有司
攝事大祠但初獻官即前期七日南嚮讀誓戒文無臨
涖受誓之官謹按祭祀之有誓戒所以要之以刑重失
禮也古者掌誓戒有專官欲人之聽於一也周有太宰
掌百官之誓戒謂其天官之長且佐王治故也以大司
寇涖誓百官戒千百族蓋言失禮則入刑故也唐以太
尉掌誓戒今以宰相親王執政官宗室使相郡王節度
使以上為獻即掌誓戒得其職矣蓋與周之冢宰唐之
太尉同意自餘初獻止是禮部尚書已下既不攝太尉
猶行太尉之事誤矣伏謂自今諸大祠降宰相親王執
政官宗室使相郡王節度使以上為初獻行事依舊掌
誓戒外餘以吏部尚書或侍郎一員掌之蓋吏部天官
之任也仍用刑部尚書一員涖誓闕即以侍郎充所有
親祠掌誓戒即合用左右僕射掌誓涖誓勅依所請
後唐同光三年洛京蕃漢馬步使朱守殷於積善坊役
所得古文錢四百五十六文曰得一元寶四百四十五文
曰順天元寶史不載何代鑄此錢以俟知者

唐宮中每有行幸即以龍腦鬱金布地至宣宗性尚儉
素始命去之方唐盛時其侈麗如此國朝故事乘輿親

文昌雜錄 卷三
祠郊廟拂翟後以金合貯龍腦內侍捧之布於黃道重
齊潔也

戶部馬員外乞守明州既受命因閱昔年卦影見畫一
豕其上日月相並下有舟一隻亥年明州之應豈不了
然邪

尚書省舊有甲庫未詳是何名唐大和二年勅尚書省
二十四司制勅及勅甲等近日檢報多稱斷裂宜各委
本司郎中甲庫官並重粘皆及同書名印所斷裂縫跋
尾後云某甲勅卷若干縫斷裂乃知甲者勅甲之謂也
三月以新江淮發運使呂嘉問爲吏部郎中

十八日集英殿大宴酒九行初有司預於殿庭設山樓
排場爲羣仙隊仗六蕃進貢九龍五鳳之狀設鷄唱樓
於其側殿上陳繡帘垂香毬設銀香獸於檻內布以文
茵設御茶酒器於殿東北楹間羣官骨頭索粉白肉餠
餅羣仙鹵天花餅太平畢羅乾餈縷肉羹糖油餅再坐
假圓魚蜜浮斯奈花肉鮓排炊羊炙金腸餃子饅頭肚
羹水飴下飴教坊已下凡支賜絹二千四百餘疋綵百
疋錢七百七十餘貫錦一端銀椀三十五口春秋常例
也

國朝之制凡百官拜表稱賀詣東上閣門進名奉慰即

詣西上閣門蓋有故事唐天祐二年勅自今五月一日
後常朝出入取東上閣門或遇奉慰即開西上閣門遂
爲定制焉唯諸軍員寮每奉慰立班去杖子未詳所出
後唐莊宗同光元年中書門下奏每日常朝百官皆拜
獨兩省官不拜准依前朝故事朝退於廊下賜食謂之
廊飧百官遂有謝食拜惟兩省官本省有厨不赴廊飧
故不拜伏自僖宗幸蜀回以多事之後遂廢廊飧百官
拜儀至今未改將五十載禮恐難停惟兩省官獨尚不
拜豈可終日趨朝曾不一拜獨於班列有所異同若言
官是近臣於禮尤宜肅敬自今已後逐日常朝宣不坐
其兩省官與東西兩班並齊拜從之至明宗天成元年
五月內出御札一封賜宰臣曉示文武百寮每日正衙
常朝外五日一度赴內殿起居其後遂以爲常非故事
也皇朝百餘年未遑刊正謬誤今上熙寧五年方講日
朔文德殿視朝立仗之儀

殿廷東西左右面各金吾引駕官一名四色
官二人各帶儀刀金甲天武官一名殿中省
排列官一名扇二方繖一金吾仗碧欄一十
一各執儀刀兵部儀仗排列職掌二人押隊
員寮二人黃麾幡一告止幡一傳教幡八信

幡八龍頭竿五十戟五十判殿中省一員在
左天武官東西共一百人門外東面青龍旗
一五嶽旗五五龍旗十西面白虎旗一五星
旗五五鳳旗十仗馬每面三疋每疋御龍官
四人前一日有司供帳於文德又設御幄於
文德殿之後門又設中書門下至文武百官
等幕次於朝堂應宰臣親王使相樞密使帶
平章事已上出赴外班叅知政事學士臺省
官待制皇親及見任節度使兩使留後觀察
防禦團練刺史文武百寮殿前馬步軍司諸

軍將校并皇親駙馬都尉合赴班者及外國
蕃客合赴朔望起居者並赴立班其日左右
金吾將軍常服押本衛仗判殿中省官押細
仗先入殿廷東西對列諸軍將校分入殿庭
北向立朝堂引贊官引彈奏御史二員入殿
門內踏道下當殿向北立次催文武百官班
至丞郎尚書次兩使留後觀察防禦團練刺
史並歸本品序立次引兩省宣制侍御史中
丞知雜三院御史入次引文班一品二品入
次學士并節度使入立於右省班前通事舍

鈔本言
官之北

喝鈔未唱
引字之祀

此第一字當是

人分引宰臣親王使相叅知政事入並東西
相向對立皇帝鞞袍垂拱殿坐內侍鳴鞭內
侍都知押班供奉官已下帶御噐械等其餘
祇應諸司使副使等並公服繫鞵作一班四
拜起居訖次呈進目客省閣門使副使次通
喝對立覺察失儀通事舍人次宿衛諸班次
殿前諸_都指揮使副都指揮使都虞候次行門
指揮使並依朔望常例殿前都指揮使已下
起居畢換窄衣祇候引駕次通事舍人引樞
密宣徽使三司使副使樞密直學士內客省
使已下諸司使已下至醫官待詔及脩起居
注官二員大起居訖諸司使已下並先退其
合係排立供奉官已下並先赴文德殿於文
武百官班北東西排立有司進輦皇帝乘輦
樞密使已下至閣門使殿前都指揮使已下
並前導至文德殿門樞密宣徽使副樞密直
學士內客省使至閣門副使樞密承旨至諸
房副承旨各歸殿上侍立位脩起居注官夾
香案分左右北向立於螭階之下通事舍人
二員殿庭北向對立其餘係祇候通事舍人

鈔本仗

並於殿下稍東侍立天武官等各衣繡分東
 西排立司天監奏時刻閣門奏班齊皇帝自
 後閣出殿上索扇升坐內侍鳴鞭扇開簾捲
 儀鸞使焚香舍人唱天武官等拜奏聖躬萬
 福又唱拜再拜隨拜呼萬歲唱各祇候依舊
 排立鷄人唱時通事舍人一員就彈奏御史
 立位稍東西唱拜大起居唱各祇候訖彈奏
 御史分左右由文武班後轉至彈奏御史位
 對立次左右金吾將軍二人合班於奏事石
 位南躬東南對立通事舍人唱拜大起居訖
 班首奏軍國內外平安又唱拜再拜隨拜呼
 萬歲唱祇候分歸東西押伏位東西對立通
 事舍人進至宣制石位南北向立以後通班
 西面對立舍人退於西階次通事舍人分揖
 宰臣親王已下躬通事舍人通文武白寮臣
 某姓名已下起居舍人通訖退歸侍立位通
 事舍人分引宰相已下橫行諸軍將校不橫
 行閣門使唱拜大起居訖舍人引宰臣至奏
 事石位南俛伏跪致詞祝月其辭云文武百
 寮宰臣全銜臣某姓名等言仲春之吉伏惟

尊號皇帝陛下膺受時祉與天無窮臣等無任歡呼抃蹈之至俛伏興引歸位閣門使喝拜再拜搢笏舞蹈俛伏興再拜喝各祇候閣門使揖宰臣叅知政事由東階升殿樞密使帶平章事已上由西階升殿侍立給事中之南吏員復歸左省位立轉對官立給事中之南吏部侍郎及刑法官立於轉對官之南兵部侍郎立於右省官與吏部侍郎東西相向對立其吏部侍郎候到位置簿置笏上親王使相學士臺省官等並分班出次引轉

對官於奏事石位南宣徽使殿上承旨宣答并失儀彈奏並如常儀如宰臣親王使相叅知政事失儀並左右彈奏御史合班彈奏轉事官奏事畢出次吏部兵部侍郎及刑法官對揖出次彈奏御史對揖出次給事中右位南躬通事舍人喝祇候出次起居注官合班於奏事石南躬通事舍人喝各祇候分班出次排立供奉官已下合班於奏事石位南舍人喝各祇候分班出次通事舍人喝天武官等門外祇候應喏出殿上索扇簾垂皇帝降

坐乘輦還內侍鳴鞭通事舍人當殿承旨
放仗四色官蔽鞞急趨至宣制石位南稱奉
勅放仗金吾將軍并殿中省官對拜訖隨仗
出親王使相節度使至刺史學士臺省官文
武百寮諸軍將校等並叙班於朝堂喝賜茶
酒門謝畢退皇帝御垂拱殿坐中書樞密及
請對官奏事如常儀閣門更不引見謝辭班
崇政殿亦不視事如遇有德音制書御札俟
皇帝垂拱殿再坐制箱方出付外

元豐四年始罷正衙常參

侍御史知雜滿中行劄子伏見本臺見行儀
制內兩省官文武百官日赴文德殿東兩相
向對立宰臣一員押班聞傳不坐則再拜而
退謂之常朝遇休假併三日已上應內殿起
居官畢集謂之橫行自宰臣親王已下應見
謝辭者皆赴文德殿謂之過正衙然在京釐
務之官例以別勅免參宰臣押班近年已罷
而武班諸衛本朝又不常置故今之赴常朝
者獨御史臺官與蕃官待次階官而已其武
班既無本品因今使臣十員假攝以實之臣

嘗終始考求蓋以循乎唐制而失之者也按唐制京司文武職事官省朔叅望叅有五日叅唯職事官五品并供奉官八品已上及員外郎監察御史太常博士則每日叅蓋職彌親者叅彌數也今垂拱內殿宰臣已下旣已每日叅矣而文德常朝仍復不廢又使待次攝班之人數十員以應文武百官而冒常叅之名舛謬倒置莫此爲甚至於橫行叅假與夫見謝辭官先過正衙雖沿唐之故事然必俟天子御殿之日行之可也自唐室衰宣政視朝之禮廢應謝辭者始與常叅之官同至正衙叙班以應故事五代沿襲不復改正遇入閣日則正衙先拜而後喚仗五日内殿起居則見謝辭官先退而後入因陋習謬轉相傳承失之益遠持之益固是以歷數百年而未有以正其非也竊攷周官天子三朝内外異位燕治異儀宰夫掌治朝之法而司士正其位司寇掌外朝之政而朝士建其法至於燕朝則正位掌賓相者太僕而已朝儀詳略之辨可槩見於此矣唐因隋制大朝會御承

天門爲外朝朔望御太極殿爲中朝日朝事於兩儀殿爲內朝而大明宮制亦以含元宣政紫宸三殿以當三朝之位而有正衙上閣之稱雖於古制未必盡合而內外有序隆殺有辨良有取焉伏觀陛下稽經攷古更定官制損益革因撥自聖學一代之典於斯爲盛而文德正衙之制尚存常朝之虛名襲橫行之謬例有司失於申請未能釐正誠恐不足以稱明詔示來世欲望特隆指揮先次罷去若夫因今殿庭以分內外之朝隨今官品高下以爲進見疏數之節并其餘應干廢置事件即俟依近降朝旨本臺與閣門別具事目進呈取旨裁定奉聖旨送詳定官制所詳定聞奏檢會唐書百官志及儀制令文武職事官九品以上及二王後朝朔望文武五品以上及兩省供奉監察御史郎太常博士日參日叅號常叅官武官三品以上三日一朝號九叅官五品以上及折衝當番者五日一朝號六叅官長上折衝果毅若文武散官五品已上直諸司及長上者各准職事叅其常叅

官隔假三日以上即橫行叅假竊詳唐制即是有職事要官朝見數而無職事及官品卑下朝見亦疎也今在京文武升朝官未有職事者每日常叅宣勅不坐再拜而退有職事者乃五日一赴起居其辭見謝恩皆先赴文德殿拜而退謂之正衙連遇朝假則百官詣舊文而實與唐制甚異蓋唐制日御殿以見羣臣日常叅不臨前殿而御便殿喚仗由閣門入百官俟朝于衙者因隨以見故謂之入

閣至其後世未曾日視朝而入閣之制亦廢常叅之官日至正衙者聞傳不坐即退至明宗始羣臣五日一隨宰相入見內殿謂之起居蓋非唐盛時之本制也唐之常叅乃職事五品及供奉官臺省之官其後不御前殿又廢入閣之儀常叅官至正衙聞傳不坐而退今天子聽政于垂拱殿以接執政官及內朝之臣而更於別殿宣勅不坐實為因習之誤兼有職事升朝官五日一赴起居而未有職事者反日叅疏數之節尤為未當又辭見謝

文獻通考卷三
自己入見天子則前殿正衙對拜自爲虛文
其連遇朝假則百官自赴大起居不當復有
橫行參假其滿中行乞罷常朝及正衙橫行
委得允當

及官制既行又有日參望參朔參之制

門下省起居郎以上中書省起居舍人以上
尚書省侍郎已上御史中丞已上爲日參官
其知樞密院以上自如舊儀以三省及御史
臺官寺監長貳以上爲六參寺監丞大理評
事已上爲兩參官寄祿官通直郎以上爲月
參官又今後除朔望參外每月定以五日二
十日二十一日二十五日爲參日遇假即罷
如契丹使見辭曰並特起居其前後三日內
合起居權罷

然則正衙常朝昔者省臺寺監應在京釐務官每日並
集其後以妨廢職事乃罷之獨待次官赴耳初無疏數
之別方唐盛時正衙立仗百官廊食日以爲常五日起
居雖始於明宗蓋亦喚仗入閣之遺意天子之朝莫先
於正衙於禮羣臣無一日不朝者而唐朔參望參每日
參六參九參之類並謂衙殿天子日御宣政殿中金吾

細仗兵部旂幡等設於廷朝官退皆賜食開元中以朔望宗廟上牙盤欲避正殿遂御紫宸喚仗入閣門自此始也如此則常衙常叅果可廢邪

世說海外有燕子至秋社乃去仲春復來詩謂玄鳥也春分玄鳥降昔年因京東開河岸崩見蟄燕無數晉郝鑿爲兗州刺史鎮鄒山百姓饑饉或掘野鼠蟄燕而食之乃知燕去亦蟄耳驚蟄後中氣乃來非復度海也唐通事舍人宣詔舊令拾遺團句把麻者蓋謁者不知書多失句度故用拾遺低聲摘句以助之及呂溫爲拾遺被喚把麻不肯去遂成故事拾遺不把麻自呂始時

柳宗元戲呂云幸識一文半字何不與他把國朝文德殿宣麻案自東上閣門出閣門使押至當衙橫街北躬云付門下宰相跪授訖歸位以授通事舍人折方揖殿至宣制位搢笏宣讀兩舍人捧之然團句每以爲艱也內香藥庫在謬門內凡二十八庫真宗皇帝賜御詩二十八字以爲庫牌其詩曰每歲沉檀來遠裔累朝珠玉實皇居今辰內府初開處充物尤宜史筆書東庫內有王燒金藥一鑪至今猶在又有辰砂一塊其上忽生新砂二十二顆赤如火色嘗取之禁中還送本庫焉答曰昔見故老說有一朝士好爲諧謔嘗云近求得一對的

鈔本而誤作瓶

鈔本多

似有理躁因脩賀刺怒爲答空書聞者無不大噱
晉王戎妻語戎爲卿戎謂曰婦那卿壻於禮不順答曰
我親卿愛卿是以卿卿我不卿卿誰當卿卿戎笑遂聽
東哲亦曰婦皆卿夫子呼父字有一士人作詩謂婦曰
卿非也

文昌雜錄卷第三

文昌雜錄卷第四

南安 龐元英 懋賢

四月六日壯遼賀同天節使副見望叅官起居是日微
雨特放唯引對壯遼使者於紫宸殿酒五行罷

戶部王員外言昔年作一夢甚奇一布勝大書云七元
均氣丁丑人作相後數年今右僕射蔡公拜公丁丑生
實契此夢乃知宰相固有默定如紗籠中人之類前書
所記者甚多也

國子朱司業言南方柑橘雖多然亦畏霜每霜時亦不
甚收唯洞庭霜雖多即無所損詢彼人云洞庭四面皆

水也水氣上騰尤能闢霜所以洞庭柑橘最佳歲收不耗正為此爾

鈔本青

元英昔隨侍太源見是年秋解進士正額外續解李霖朝廷以故相曾有此比令禮部收試既而正額所送多省下榜出有霖姓名遂及第今為朝奉大夫及至育州秋試進士已鎖院今太府寺丞王璋以病在道久八月半方到州牒試院亦令收試文在優等解送甚高明年登科而歸信有命也

鈔本世十字 亦作一

庫部林郎中說建州上春採茶時茶園人無數擊鼓聞數十里然亦園中才間壟茶品高下已相遠又况山園之異邪太府賈少卿云昔為福建轉運使五月中朝旨令上供龍茶數百斤已過時不復有此新芽有一老匠言但如數買小銚入湯煮研二萬權以龍腦水灑之亦可就遂依此製造既成頗如歲進者是年南郊大禮多分賜宗室近臣然稍減常價猶足為精品也

鈔本推

倉部韓郎中云叔父魏國公喜飲酒至數十大觴猶未醉不甚喜茶無精麤共置一籠每盡即取碾亦不問新舊嘗暑月曝茶於庭中見一小角上題襄字蔡端明所寄也因取以歸員王家白後見蔡說當時祇有九銚又以葉園一餅充十數以獻魏公其難得如此

鈔本頁

文昌雜錄 卷四
司門范郎中云叔父蜀郡公鎮近居許昌作高庵以待
司馬公累招未至庵極高在一臺基上司馬公居洛作
地室隧而入以避暑熱故蜀郡作高庵以為戲也北京
留守王宣徽洛中園宅尤勝中堂七間上起高樓更為
華侈司馬公在陋巷所居才能庇風雨又作地室常讀
書於其中洛人戲云王家鑽天司馬家入地然而道德
之尊彼亦不知顏氏子之樂也

工部王侍郎云昨謫守單州後圃有宓子賤琴臺為一
郡之勝獨此可以銷憂耳有詩云琴聲久逐秋雲去臺
勢空隨古堞高既名還見於垂拱殿與呂資政同班殿
廬因話琴臺後數日呂遂知單州甚可異也

祠部每歲祠祭大祠三十正月上辛祈穀上帝四月雩
祀上帝九月明堂祀上帝冬至祭昊天上帝夏至祭皇
地祇孟春孟夏孟秋孟冬臘五享太廟正月上辛祀感
生帝立春祀青帝立夏祀赤帝立秋祀白帝立冬祀黑
帝土王祀黃帝春分祀高禘春分朝日仲春仲秋臘祭
太稷仲春仲秋祀九宮貴神孟冬祭神州地祇秋分夕
月臘蜡百神立春祭東太一宮立夏立冬祭中太一宮
立秋祭西太一宮中祠十有四立春後亥祭先農立春
後丑祀風師仲春祀五龍季春享先蠶立夏後申祀雨

師雷師四立井土王祭嶽鎮海瀆仲春秋上戊釋奠
武成王小祠十有三立冬後亥祭司中司命司民司祿
秋分享壽星立秋後辰祀靈星孟冬祭司寒仲春祭馬
祖仲夏享先牧仲秋祭馬社仲冬祭馬步立春祭尹司
命立夏祭竈季夏土王祭中雷立秋祭門及厲立冬祭
行皆有司行事焉

元英昨充元豐五年賀北朝正旦國信使行至神水驛
苦風眩昏亂不記省隨行小史輩皆環坐以泣通一昔
方稍安是年正旦接伴使杜刑部絃至深澤縣界中浴
幾不可救劉右司摯充賀同天節接伴使公路病傷寒
至滑州增劇然艾數百肩輿以歸後累月方安一歲中
奉使者皆得疾危甚殊可恠也

禮部尚書黃公說丙申年秋試進士僅八千人國朝以
來未有如此之盛他試院不能容始命就開寶寺分數
場引試開寶為試院自此始禮部林郎中以清微之風
養萬物賦為第一人始可謂雄魁也

元豐三年高麗國遣使柳洪副朴寅亮朝貢且獻日本
國車一乘洪云諸侯不貢車服誠知非禮本國所以上
進者欲中朝見日本工拙爾朝廷為留之高麗本箕子
之國其知禮如此

戶部劉郎中說雄州城南陂塘數十里芰荷極望以小舫遊其閒鷗鷺往來紅香泛於樽俎雖江鄉亦無此景四時有蟹暑月亦甚肥昔見謝通議言曾通判莫州有戎卒溺塘水死州請覆驗既到彼尸不可得所司云水中積蟹一窖莫知淺深尸在其下無由得也雄莫間蟹多如此

右司郎中劉摯罷以提點開封府界諸縣公事楊景畧爲右司郎中以知壽州葉溫叟爲都官員外郎以提舉荆湖北路常平倉李莘爲屯田員外郎

禮部尚書恩賜今年龍茶一斤折簡諭林郎中云欲以五餅分送郎官如何林獻答云衆官叅詳委得允當遂以分送五廳他則不然也

元豐五年五月官制始行兩省官但除給事中中書舍人起居郎起居舍人而已六年四月方以監察御史王桓爲右正言

五月一日文德殿視朝仗衛如式是日對于闐國進奉使貢物充廷多白玉熙寧六年大食俞廬和地國亦貢雲霞白玉圭一副今藏內帑

詳定禮文所上言臘蜡百神四方並就南郊一壇禮未合古請蜡祭四郊各爲一壇東方日西方月各神農配

文獻通考卷四百
五
作大祀南方神農爲神主后稷配壯方亦神農爲神主
后稷配係中祠其五官五田峻五星二十八宿十二辰
五嶽四鎮四海四瀆每方山川木澤正陵墳衍原隰井
泉水墉坊郵啜青龍朱雀騏驎白虎玄武於菟鱗羽介
毛羸猫昆虫並如故事若其方有災害則闕而不祭詔
可

國子司業朱服上言惟先王之時燕飲必有射將祭擇
士於射宮能偶則又別之以射射武事也先王於進成
人材之際每不廢焉今養士之盛莫盛於大學而大學
之士鮮能知射羯見武學教場與國子監相去數十步
欲使太學諸生遇假有願射者聽往習焉不惟閒暇之
時使游於藝又足以收其放心而不遷於異物狀下禮
郎羣官皆以爲然上都省乞如所請云

元豐四年高麗國遣使崔思齊副李子威朝貢并獻樂
器明年正月十四日車駕幸集禧觀詔思齊等侍從又
令所遣樂工對御獻樂賜袍帶銀帛有差思齊言今高
麗樂是新羅樂樂器有嘉配嘉配琴謂笛爲大吟舞有七十
餘種止用兩人謂之攀花云

勅大忌日六曹諸司並不作假執政官早出官司不得
隨出前此車駕遊幸及臨奠宗室若大臣咸爲之舉哀

及後苑觀麥觀稻觀穀觀橙及延和殿壯遼禮物崇政殿疎決景靈宮朝謁壯使見辭執政禮上皆早出故有是勅

資州上言資陽縣民支漸葬母於賴錫山漢中廬於墓側已經三年自負土成墳布素不食五味惟菽粟而已日三時號慟餘時即誦佛經有白黑雀各一對盤泊墳上松間每有野狸白虵兔自山上來看上土久之方去又有白鷄及五色雀計萬餘圍繞乞行旌賞勅特賜粟帛

熙寧中福建賊廖恩聚羣黨於山林招撫久之方出降朝廷赦其罪授右班殿直既至有司供脚色一項云歷任以來並無公私過犯見者無不笑之

祥符中開寶寺福勝院舍利塔上光明或似水晶或似金色於相輪上或隱或顯又降下舍利於地面磚石上約五千餘粒僧俗虔心求覓必獲露足真宗幸塔下焚香有舍利見大如拳色如水晶名從臣同觀泊賜食退舍利復見於西北鈴索上往來飛動臣庶莫不瞻覩今慶壽崇因閣慈聖光獻太皇太后所建即其地也

閣門舊儀大宴更衣降坐羣臣退再坐羣臣先升殿既就坐御羣臣謝花拜於坐次天禧中司諫祖士衡上言

欲望每更衣再坐有司引羣臣班於殿廷俟升御坐謝
花於廷乃分引上殿自此始也

禮部王員外說昔有一舉子恩澤榜授三班借職作歌
後詩詩云官資得箇三班借請給全勝錄事叅從此罷
稱鄉貢進這回走馬東西南唐宰相鄭棨好作歌後句
此詩亦甚工也

元豐三年高麗國王王徽以疾表乞太醫朝廷遣國門
通事舍人王舜封押至彼國舜封上言十二月一日徽
生辰北遼遣起居郎知制誥馬堯俊充使留仙賓館堯
俊獻徽詩云始從鈎裂海東天世世英雄稟自然掌上
寶符鈐造化胸中神劔畫山川太宗莫取龍州道煬帝
難乘鴨綠船真是金輪長理國豈論八萬四千年徽以
錦綉八百匹爲謝云

給事中徐禧歿於王事朝廷錄其子弟十餘人以弟祕
爲太廟齋郎祕自陳願閣此恩以待兄有嫡孫長日推
授朝廷嘉而許之祕爲太學生有聲名而孝悌廉退之
行又如此

開寶六年翰林學士李昉知貢舉放進士及諸科及第
者凡三十八人下第進士徐士廉自陳屈抑即詔貢部
以八等第進士并終經學人並親覆於殿廷內出未明

求衣爵待士詩進士宋準等一百二十七人並放及第
昉所放退落者十人責授昉太常少卿御試舉人自此
始也

淳化中有司言油衣帟幕損弊者萬數欲毀棄詔令煮
而浣之命尚方染以雜色刺爲旗幟焉

元豐元年詳定禮文所言古者祀天於地上圓正在國
之南祭地於澤中之方正在國之北其牲幣噐色歌詩
奏樂亦皆不同凡以順陰陽因高下而事之以其類也
漢元始間以祀樂旣各有合而禮又有夫婦共牢之文
於是合祭天地以隆一體之義後漢魏晉及唐以來皆

因仍之本朝親祀上帝即設皇地祇位稽之典禮有所
未合勅詳定更改禮文聞奏陳襄議曰漢元始中姦臣
妄議不原經意附會周官大合樂之說謂當合祭於帝
從而用之故天地共犢禮之失自此始矣臣以謂旣罷
合祭則南北二郊自當別祀伏請每遇親祠之歲先以
夏日祭地祇於方正然後以冬至祀昊天於圓邱李
清臣議曰欲乞每遇親郊七日戒之後三日宿之時宿
太廟以告宿北郊以祭宿南郊以祀所以先太廟者告
祖爲配也所以先北郊者先卑後尊也然雖自北郊至
南郊相去爲遠則中道不可以無舍請爲帷宮止而後

進王存議曰國家用冬夏至遣官攝事於二郊蓋周禮未嘗廢也其三年一有事於南郊實同漢制若因三歲之期漸輟郊正之祀間有事於北郊如先朝親耕祫享之比則不失恭事天地之意陸佃議曰今或冬至親祠昊天上帝因即圓正之北別祠地祇不崇朝而天地之祠畢舉矣張璪議曰竊謂陽生於十一月陰生五月則陰陽之生天地致用之始故天神地祇可得而禮然當今萬乘儀衛加倍於古方盛夏之時不可以躬行臣以謂宜即郊祀之歲於夏至之日盛禮容具樂舞遣冢宰攝事雖未能皆當於禮庶幾先王之遺意猶有存焉勅如璪議其親祠南郊罷皇地祇并從祀位六年五月二十八日夏至適當親祀之歲於是左相王公攝事禮部黃尚書太常李少卿爲亞終獻中書蔡舍人讀冊文且用備樂愚以謂祠官當給本品鹵簿方可爲盛禮容也

禮部黃尚書上言伏覩覆定臣寮謚議其法質明入內廢務一日假故旣頻事易停壅欲乞自今集官覆謚午刻入省勅依乃罷酒食故事尚書省集請謚之家自設醪饌舊從官給今方罷之

吏部頒給印歷六曹尚書侍郎左右僕射左右丞批都

司郎官左右丞批二十四司郎中員外本曹尚書侍郎
批以書逐考功過焉

六月二日三省官集於吏部寓治都聽講求奉上仁宗
皇帝英宗皇帝徽號初四日兩省官與尚書省左右司
郎已上又赴門下中書都堂再議執政官在中設羣官
位重行皆北向焉

晉志云袴褶之制未詳所起近代車駕親戎中外戒嚴
則服之唐制三品以上紫褶五品已上緋褶通用細綾
七品已上綠褶九品已上碧褶通用小綾玉藻云禪為
綱音引急也帛為褶今裕也鄭云單為綱有衣裳而無

裏者也帛為褶有表裏而無著者也周遷輿服雜事云
趙武靈王纓胡之纓戎服有袴褶之制始有漢武近世
服以從戎隋制纘嚴文武百官咸服之車駕親戎則縛
袴使不舒散皇朝導駕官袴褶蓋馬上之服也

太子太師張公昇大中祥符八年歲在乙卯登科熙寧
九年丙辰終於許州陽翟縣里公起布衣致使相自初
仕至薨謝歷一甲子近世所無也

真宗皇帝東封選次太平驛賜從臣辟寒丸仁宗每崇
政殿親試進士亦賜大臣七寶茶至今以為故事夫
以禮部尚書黃履為御史中丞

詳定禮文所言謹按儀禮曰夫婦一體故昏禮則同牢而食合卺而飲終則同穴祭則同几同祝同饌明夫婦一體未有異廟者也恭惟孝惠皇后太祖皇帝元妃淑德皇后太宗皇帝元妃章懷皇后真宗皇帝元妃而孝章皇后實太祖皇帝繼后當時議者或以其未嘗正位中宮或以其繼而不許其配有司因循不究其實皆祭以別廟在禮未安伏請升祔太廟以時配享勅恭依仍於今年大禮前更不行孟冬薦享止俟升祔禮畢遍享太廟并祭七祀配享功臣其太廟祔室三省看詳合以配繼先後爲序云

以太常少卿李常爲禮部侍郎以司勳郎中葉均爲秘書少監以戶部員外郎黃好謙爲司勳員外郎以提點開封府界當平倉張詢爲戶部員外郎

鈔本終

通典梁御史中丞給威儀十人其八人武冠降絳緹衣執鞭杖依行列行七人唱呼入殿引隍音橫至階一人執青儀囊不隍國朝故事御史中丞告官呵引至朝堂門兩朱衣吏告引入朝堂至文德殿門止蓋亦引隍之比也

長安隱士曰高繹有古人絕行慶歷中召至京師朝廷欲命以官固辭歸山特賜安素處士家甚貧妻子寒餒

終不以困故受鄉人財閉門讀書而已昔王霸憐其子蓬髮投耒愧卧不起前賢之所難而處士蹈之有餘裕也嘗見古老說種放隱終南山名拜起居舍人賜告西歸有一高士隱居三世以野蕪一盤詩一篇贈放云接得山人號舍人朱衣前引到蓬門莫嫌野菜無多味我是三迨處士孫放國史有傳若夫志意修則驕富貴道義重則輕王公惟安素可以無慙矣

舊三司使廳屏風崔白畫蘆雁用意極工昨爲僕丞都堂此屏在後閣及遷都省左僕射命移於尚書令廳後亦近世之奇筆也

閏六月以新差權知曹州井亮采爲戶部員外郎

二十四日尚書令廳集三省官上仁宗皇帝英宗皇帝徽號奏議羣官雜壓非故事也愚以謂左僕射當坐東偏南向門下侍郎次之左省官列於東北壁下重行南向右僕射坐西偏南向中書侍郎次之右省官於西北壁下重行南向左丞東相對如學士太常卿皆赴即坐於正南北向雖未必盡合舊儀猶愈於雜壓也

七月十二日后升祔於太廟兵部黃麾仗太常鼓吹一千八百餘人重翟車四乘是日五鼓神主自后廟升綵殿宗室正任已上步導進行直南泂城入太廟至南神

門外降絳殿入幄升腰輿各附本室太祖室曰孝惠次
孝明次孝章太宗室曰淑德次懿德次明德次元德真
宗室曰章懷次章穆次章獻次章懿既升祔行遍享之
禮雍王曹王濮陽郡王充三獻禮畢百官詣東上閣門
奉表稱賀

以戶部尚書安燾為司知樞密院事以吏部侍郎李承
之為戶部尚書以戶部侍郎陳安石為吏部侍郎以河
北都轉運使蹇周輔為戶部侍郎以左司郎中吳雍為
直龍圖閣河北轉運使以吏部員外郎曾伉為左司員
外郎又以司勳員外郎黃好謙為郎中以戶部員外郎
井亮采為金部員外郎

唐德宗正元十年七月賜故唐安公主謚莊穆蓋公主
賜謚始於此也

韓文公永正行云公然白日受賄賂火齊磊落堆金盤
南史中天竺國說火齊狀如雲母色如紫金有光輝別
之則如蟬翼積之則如紗縠之重沓又王子年拾遺記
曰董偃嘗卧延清之室上設火齊屏風所謂磊落者亦
珠璣之謂也

二十五日文武百官詣太廟奏請上仁宗徽宗號曰體
大法道極功全德神文聖武濬哲明孝皇帝左相行事

起居郎蔡京著作郎豐稷讀祝其祝言皇帝謹遣百官
奏請徽號之意云

二十八日詔門下升祔禮畢宜覃慶澤以暨後昆四后
之家各與最長者初等官已仕者改一官

乾德五年正月十六日詔以朝廷無事年穀屢豐上元
觀燈可更增十七十八日兩夜自後每至十六日開封
府以舊例奏聞皆詔更放兩夕雍熙二年十月下元節
張燈賜近臣宴於樞密使王顯私第夜分命中使賜御
製詩一章其後每燈夕皆命中書樞密分往大寺焚香
就賜御筵遂爲故事自此始也

杜甫紫宸退朝詩云香飄合殿春風轉花覆千官淑景
移又晚出左掖云退朝花底散歸院柳邊迷乃知唐朝
殿亦種花柳今殿庭唯對植槐楸鬱鬱然有嚴毅之氣
也

八月左丞蒲宗孟罷出知汝州以右丞王安禮爲左丞
以吏部尚書李清臣爲右丞以端明殿學士知蘄州曾
孝寬爲吏部尚書以都官員外郎葉溫叟爲郎中

禮部李侍郎說秘書少監孫莘老莊居在高郵新開湖
邊嘗一夕陰晦莊客報湖中珠見與數同行小草徑
中至水際見微有光彩俄而光明如月陰霧中人面相

覩忽見蚌蛤如蘆蓆大一殼浮水上一殼如張帆狀其疾如風舟子飛小艇競逐之終不可及既遠乃沒

九月以吏部郎中呂嘉問爲光祿卿以司勳郎中黃好謙知揚州是月都官員外郎許安世以憂去官

皇祐二年大享明堂仁宗謂輔臣曰前代禮神有祭玉燔玉二品今獨燔玉無乃闕禮文邪輔臣等對曰唐大和中太常卿王起以當時祀事止有燔玉而無禮神美玉請下有司造蒼璧等七玉祭訖藏之燔玉即用珉唐末以來祀典廢闕禮神之玉不復備用以至於今勅其令有司議如典禮是時適回紇貢玉璞數十剖之命匠者制爲蒼璧黃琮四圭有邸青圭赤璋白琥黝璜尤温粹祭玉之備始復於此

十月以右司郎中楊景略爲起居郎以錢勰爲左司郎中以孫覽爲右司員外郎又以大理卿楊汲爲刑部侍郎

十一月十二日大慶殿遣上仁宗皇帝英宗皇帝玉冊玉寶上服絳紗袍再拜廷中跪授冊寶使既出大慶門禮儀使奏禮畢上猶立廷中冊寶升輅既遠從官方前導歸御幄云

十五日遷寓治禮部入新省自尚書令列曹員外郎廳

屏風皆書周官一篇在位何以稱上所以戒責之意邪
南郊大駕上乘舊玉輅戶部王員外說輅上有欵識唐
高宗顯慶年造高宗麟德三年玄宗開元十三年真宗
皇帝祥符元年封禪此輅凡三至泰山開元十一年祥
符四年亦兩至灘上真所謂萬乘之器也

司封員外郎王祖道出知汀州以禮部員外郎王子韶
爲庫部員外郎以太常博士何洵直爲禮部員外郎以
駕部郎中吳安持爲太府少卿以柯述爲司封郎中以
蘇注爲司勳員外郎以王兢爲倉部員外郎以蒲宗閔
爲都官郎中

十九日車駕詣萬壽觀恭謝畢由天波門幸尚書新省
至令僕廳遂徧至六曹傳宣尚書侍郎郎中員外郎各
轉一官主事已下等第支賜凡二萬緡至禮部上顧謂
侍郎李常曰唐尚書省亦止於四千楹又問吏額多少
常具以對又宣諭云朝廷待遇責任之意非輕卿等各
宜自勉雖千載難逢之期顧羣臣何以上報聖恩邪

十二月一日文德殿視朝仗衛如式是日大風詔移御
紫宸殿百官起居正如唐喚仗入閣之儀也

右省趙諫議說王汾學士皆言夢中見人云君要如意
須逢元公了不曉所謂後數年得知兗州其字即元公

方悟前夢之可信也

二十八日以魯國大長公主薨輟朝五日是日壯遼賀
正旦使副見於崇政殿賜茶而已上御靴袍自延和乘
輦至崇政非後殿常儀也

文昌雜錄卷四終

文昌雜錄卷第五

南安 龐元英 懋賢

元豐甲子正月五日宴壯遼國信使於紫宸殿酒七行
不作樂以魯國大長公主在殯故也是時上元節有司
已設山樓詔撤之罷御端闈魯國仁皇帝之女恩禮加
隆焉

熙寧二年朝廷始命兩浙福建等路轉運司招接高麗
入貢時舟人傳旋至彼國述朝廷之意王徽喜甚次年
二月十五日然燈如中華上元旋適在彼見徽賦感天
朝招接擬侍中華然燈夜述懷詩云宿罪應深近契丹

歷年徒貢事多般忽蒙舜日龍綸召便侍堯天佛會觀
燈艷似蓮裝闕焰月華如水洩雲寒夷身幸入華胥境
甚惜今宵漏滴殘福建路轉運使張徽上其事云

以開封府推官祖無頗爲駕部郎中以開封府判官胡
宗愈爲吏部郎中又以司勳員外郎蘇注爲郎中二月
五日太師致仕文公自西京造朝修謝對於垂拱詔是
日特開宴酒五行命御藥院內侍梁從政特以大觴酌
御樽酒以賜之且命飲侍臣拭目以觀恩禮之隆遇焉
慈聖光獻太皇太后天聖中冊爲皇后其文丞相呂公
夷簡之辭元豐二年奉上尊謚詔同知樞密院事呂公
著撰冊文丞相之子也樞密公亦自陳遭遇中外莫不
感異云

滕正議甫知安州苦風眩久不差有一道人贈藥方名
筠遇丹因修合服之舊恙頓愈自此遂常服旣罷官赴
闕至都城久之未有除授因^早旦服筠遇丹謂其門人云
久服此藥豈非得筠州邪不數日遂知筠州禮部何員
外正議子壻也質之信然

三月二日太師潞公西歸詔宰相執政官三省近臣學
士待制宴餞於瓊林院賜御詩以寵行前此令有司不
得收河東印節又令都水具舟由洛河以歸清明日特

宴於玉津園唯執政官得預太師以詩述感遇之意以遺丞相次日賜御詩俯同元韻恩數之隆蓋如此公卿聳羨云

十八日集英殿大宴再坐延安郡王侍立百官稱賀廷中既升殿上遣內侍引王揖宰相輔臣皆再拜以謝酒再行方還內在位瞻覩莫不悅懌抃蹈共酌賜觴焉

四月初五日禮部試饒州童子朱天錫年十一念周易尚書毛詩周禮禮記論語孟子凡七經各五道背全通無一字少誤者是日禮部侍郎名本曹郎官赴坐左右觀者數百人此童諷誦自若畧無懾懼後數日召至睿

思殿賜五經出身昔晏元獻公名貫撫州近年何正臣名占臨江皆童子舉江南多奇偉亦山川之秀使然邪以陝西轉運副使范純粹為左司員外郎補曾伉致仕闕又以倉部員外郎王兢為郎中以湖南轉運判官鄒極為度支員外郎以司門郎中范百祿為吏部郎中以太常丞呂升卿為司門員外郎

杜甫為左拾遺作紫宸殿退朝詩云宮中每出歸東省會送夔龍集鳳池東省門下也鸞臺在焉鳳池在中書省杜詩不應有誤恐唐朝別有故事又恐是時政事堂適在右省耳

五月戶部尚書李承之以憂去官以龍圖閣直學士知
開封府王存爲兵部尚書尋改戶部以戶部侍郎蹇周
輔爲寶文閣待制知開封以刑部侍郎楊汲爲戶部侍
郎

景靈宮天元殿考宮之初靈芝產於殿栱今歲孟夏朝
獻車駕詣宮前數日芝又產於殿門近臣賀於齋殿右
僕射賦詩命禮曹郎官屬和焉

登聞鼓院未知起於何代因讀唐會要見顯慶五年有
抱屈人齋鼓於朝堂詎遂令東西都各置登聞鼓自此
始也

六月吏部侍郎蘇頌以憂去官以知桂州熊本爲吏部
侍郎以庫部員外郎王子韶爲考功員外郎以路昌衡
爲右司員外郎以左司員外郎范純粹爲河東轉運使
以工部郎中范子奇爲左司郎中

禮部上言郊廟親祠儀注祭日皇帝並服靴袍至大次
於禮意未協謹按禮記郊特牲曰祭之日王皮弁以聽
祭報報謂小宗伯告時告備若今請中嚴奏外辨也韋
彤五禮精義以通天冠猶古之皮弁齋服也伏請太廟
圓正祭之日服通天冠絳紗袍自齋殿赴大次以應皮
弁以聽祭報之儀勅依

新制寺監丞簿皆輪宿直長貳每五日一點宿有一卿
長每點宿亦令丞簿自依日赴直謂長貳點宿乃點檢
之義按學士舍人新拜官有徠直舊官間數日乃點檢
直欲新來者稍休也豈點檢之謂邪士大夫不可以不
知故事一點字其誤如此
書奏之奏謂進也漢田蚡奢侈後房婦女以百數諸奏
珍物狗馬玩好不可勝數注奏進也

晉州州學教授陸長愈上言朝廷追封孟軻爲鄒國公
竊謂春秋釋奠宜與顏子並配文宣王禮部看詳孟子
於孔聖之門堂在顏子之列伏請自今春釋奠以鄒國

公孟子配食文宣王設位於兗國公顏子之次勅依
禮部上言近年禮文屢經改定而正辭錄其間尚有差
誤如元農正座帝神農氏祝文云以后稷配神作主配
座后稷云作主侑神謹按春秋公羊傳曰郊則曷爲必
祭稷王者必以其祖配王者則曷爲必以其祖配自內
出者無匹不行自外至者無主不止何休曰必得主人
乃止者天道闇昧故推人道以接之然則古者作主配
神之意本施於祖宗其間有雖非祖宗而施祝辭可以
言作主配神者如五人帝之於五天帝是推人道以接
天神勾龍之於社后稷之於稷是推人道以接土穀之

祇其祝辭俱云作主可也若並爲外祭而正配座又皆人鬼則以正座爲主其配座但合食從祭而已禮曰蜡之祭也主先嗇而祭司嗇說者謂以先嗇從祭今儀享先農亦是以先嗇爲主以司嗇爲合食而配座祝辭乃云作主侑神於正座祝文亦曰以后稷配神作主伏緣先農爲外祭正配座均爲人鬼而以司嗇主先嗇蓋自唐以來失之伏請於神農祝文云以后稷配於后稷配云配食於神如此類數十條皆刪修改正協禮意

元豐令諸私忌給假一日逮事祖父母者准此樞密安公祖妣忌方二歲時祖妣已歿疑逮事以問禮部何員外答曰禮記云生不及祖父母說者曰子生所不見又曰子生之時祖父母已死故曰生不及祖父母元豐令所逮事祖父母逮及也謂生而及見祖父母者也夫生而及見祖父母者禮許其稅服則今令於私忌給假不違禮意子之生未有不逮母者故鄭氏以逮爲及識也然則及識當以幾歲爲限曰子生三月則父名之以其三月一時天氣變有所識別故也生三月之後可謂之及識耳事者爲成人言之也成人然後知事父母之道也

七月左丞王安禮罷以端明殿學士知江寧府范純粹

為右司員外郎以右司員外郎孫覽為河東轉運使
左僕射廳西貯廊右僕射正廳各產芝草一本繪圖以
聞

禮部林郎中言昔見宋賜道說唐朝帝王帶雖犀玉然
皆黑鞮五代始有紅鞮潞州明皇畫像黑鞮也其大臣
亦然余昔通判滑州見州衙設廳東西有賈魏公祠堂
皆黑鞮玉帶不知紅鞮起於何時也

八月膳部郎中魯有開罷為提舉亳州明道官以通判
延州吳安憲為膳部員外郎

流蘇五采毛雜而垂之摯虞決疑要注曰凡下垂為蘇
張衡東京賦飛流蘇之騷殺其注云騷殺垂貌蓋流蘇
騷殺皆下垂也

宗室子漪說書于秘書省特授通直郎服緋令緋士淝
等數人應進士舉取解別試所衣白襪一時新事也

柳子厚作館驛使記云萬國之會四表之來天下之道
塗畢出於邦畿之內故館驛之制於千里之內尤望自
萬年至於渭南其蔽曰華州其關曰潼關自華而北界
於櫟陽其蔽曰同州其關曰蒲津自灞而南至於藍田
其驛六其蔽曰商州其關曰武關自長安至於整屋其
驛十有一其蔽曰洋州其關曰華陽自武功而西至於

好時其驛三其蔽曰鳳翔府其關曰隴關自渭而北至於華原其驛九其蔽曰坊州自咸陽而西至於奉天其驛六其蔽曰汾州亦由四海之內總而合之以至於關由關之內東而會之以至於王都言唐都畿之制如此雖六典所在亦不得其詳今司門職方謂宜舉唐舊制而復京畿之壯觀焉

九月駕部郎中祖無頗知潁州

二十一日以立冬祀黑帝祠官受誓戒於尚書省始舉質明故事從新勅也前此四鼓初羣官皆集多宿於近坊禮部上言以謂質也明也仍請蠲其日朝謁勅依不准禮合經據而奉祠者免後至之彈劾焉

天下諸路文武職事官總四千一百一十八員開封府

界約五十員京東路約三百七員京西路約三百八員

河東路約二百七十員河北路約四百二十員陝西路

約五百二十二員淮南路約三百五員兩浙路約三百

一員江南東路約一百九十四員江南西路約一百六

十四員荆湖南路約一百二十員荆湖北路約一百五

十三員福建路約一百一十四員成都府路約一百五

十八員梓州路約一百五十員利州路約一百四十二

員夔州路約一百一十一員廣南東路約一百六十一

員廣南西路約一百六十八員蓋十九路總數大約如此幕職判司簿尉又在其外因頒降擬舉陞陟人數式遂得見天下具員他處則無也

禮部郎中廳東直皇城其內即廣聖宮林子中云每清旦風順聞濃香東來此宮三清閣晨炷也主客又在其北正對後苑春夏燕鶻鶻無數飛翥往來上林喬木之所栖止也

起居郎楊景畧左司郎中錢勰奉使高麗七月二十四日同自密州發洋楊起居至大洋過東風飄回登州八月初二日再發洋十三日方至高麗境上錢左司郎八月四日已達彼國一海之中風勢如此又可異

開寶寺試國學進士景德寺又為別試所既開院以車營務驢車數十量載試卷赴禮部架閣數日方畢所落人數可知也

十月四日禮部試饒州進士朱天申年十二念周易尚書毛詩周禮禮記孝經論語孟子揚子老子凡十經各有一百通前日所試童子天錫之再從兄也亦召至睿思殿賜五經出身

以給事中韓忠彥為禮部尚書以左司郎中錢勰為中書舍人以吏部郎中范百祿為起居郎以直集賢院滿

口鈔本有朱筆旁注入字

中行爲左司郎中以太常丞呂希績爲吏部員外郎
世言市井市廛未曉其義如何因讀風俗通曰市亦謂
之市井言人至市有鬻賣者當於井上洗濯令香潔然
後□市或曰古者二十畝爲井田因井爲市故云又市
中空地謂之廛顏師古乃云凡言市井者市交易之處
井共汲之所總而言之也

余嘗見樞密都承旨張誠一說昔年使北虜因問耶律
蕭姓所起彼人云昔天皇王問大臣云自古帝王英武
爲誰邪其大臣對曰莫如漢高祖又問將相勲臣孰爲
優對以蕭何天皇王遂姓耶律氏譯云劉也其后亦錫
姓蕭氏歐陽少師作五代史乃曰天皇王阿保機以其
所居橫帳地名爲姓

世里世里譯者謂邪律昔蕭翰爲契丹大族其號阿鉢
本無姓氏李松爲製姓名曰蕭翰於是姓蕭二者不知
孰是也

世謂胡餅者釋名云以胡麻著之也前趙錄曰石季龍
諱胡改胡餅曰麻餅今俗字增食非也齊書曰永明九
年詔太廟四時薦麩起餅豈今之蒸餅邪

二十七日禮部試撫州進士黃居仁年十二誦尚書毛
詩并正義禮記周禮孝經孟子老子及太玄經凡九經

此後乃二條鈔本亦誤

合七十五通又試論語大義三道文理稍通勅賜五經
出身閣門送袍笏至禮部給賜焉

太師潞公歸開封府推官趙君錫作小詩二十篇紀恩
寵以送行其尤爲人傳誦者有若樂人都用教坊家席
上羣公換口誇內裏宣來蕉葉盞御前賜出縷金花全
上纔初佳句傳中官寫得便聞天聖人含笑搜尋了依
韻當時賜和篇西苑重排餞會時新篇御製降彤墀明
朝上已無公事赴宴臣寮總進詩雖王建宮辭無以過
此也

十一月職方員外郎黃莘出知汝州以秘書省著作佐
郎邢恕守職方員外郎以司門員外郎呂升卿爲兵部
員外郎以祕書丞陳宗古爲司門郎中又以曾肇爲戶
部郎中

十二月司勳郎中穆珣出知潤州以彭次雲爲司勳員
外郎以左司員外郎路昌衡爲江淮發運副使以中散
大夫李之純爲右司郎中

急告寧皆休假名也釋名曰急及也言切之使相逮及
也李斐漢書曰告請也言請休謁也寧安也吉曰告凶
曰寧又曰休沐漢律吏五日得一下沐言休息以洗沐
也

禮部投納試卷因國學至天下所解進士者諸科赴省
試者約六千人辭場之盛未有今日之比也

昔年有一大臣留守北京方暑至上關因得詩句云河
上荷花何處好坐上幕客河朔人也應聲對云市中柿
子是誰甜諸官莫不爲之恐悚而大臣終不見怒也

文昌雜錄卷第五終

文昌雜錄卷第六

南安 龐元英 懋賢

元豐乙丑正月以司勳員外郎彭次雲爲郎中
開寶寺爲禮部貢院二月十八日火凡本部貢牋與夫
所考試卷須臾灰燼畧無遺者自正月九日鑊院方定
二十八日奏號至是火詔以太學爲貢院再令引試前
此未有也

元豐六年癸亥大慶殿元會初設五輅於廷除夜三更
大風自北木拔幕屋壞新玉輅右輪入池數尺玉飾皆
碎觀者莫不駭愕八年正月二日先帝不豫二月五日

遽宣遺制方悟爲變之兆也

二月二十七日内出白麻丞相而下進官一等是日麻案在宗政殿門百官素服序班於門外南北相向通事舍人宣麻於正東西向示變禮也

元豐八年春太史奏熒惑守心是時太清宮道士王太初奏章於太一宮真室殿之中壇回云至九天門下有傳上章之命者曰已付南陵使者告行太初因敬問曰南陵使者謂誰答云見守心者是也已而又拜章於壇上回云復有傳上帝之命者云已再付南陵使者依命告行自此京師大火焚廬舍開寶寺爲甚未幾宮車晏

鈔本標行

駕太初方敢傳此事於人間也余昨充北朝賀同天節接伴使二月五日至深州安平縣前一夕大風是日寒甚雪深數尺林木多折至雄州泣覩遺制河朔人言雖極寒暮春未嘗有此異也

度支員外郎陳向權兼京西轉運使以修奉山陵增員也事畢如故云

四月以左司郎中范子奇爲直龍圖閣河北轉運使以右司員外郎范純粹爲直龍圖閣京東轉運使以吏部員外郎劉奉世爲京西北路提點刑獄以戶部郎中劉理爲京西轉運副使以金部郎中晁端彥爲利州路轉

鈔本治

運副使以都官郎中葉温叟為秦鳳路提點刑獄又以
 右司郎中李之純為太僕卿以吏部郎中胡宗愈為右
 司郎中以工部員外郎高遵惠為左司員外郎以職方
 員外郎邢恕為右司員外郎以知滑州劉摯新知信陽
 張汝賢並為吏部郎中以潞州韓宗道為戶部郎中以
 京西北路提點刑獄梁燾為工部郎中以知密州范諤
 考功員外郎呂和卿並為金部員外郎以太常博士盛
 陶為考功員外郎以秘書省校書郎葉祖合治為職方員
 外郎以閣門通事舍人文貽慶為都官員外郎
 五月左僕射王公薨以右僕射蔡公確為左僕射以知

鈔本不取附子

鈔本知

樞密院事韓公鎮為右僕射又以戶部尚書王存為兵
 部尚書以翰林學士曾布為戶部尚書以兵部侍郎許
 將為龍圖閣直學士知成都府以吏部員外郎文及為
 直龍圖閣直陝州以戶部郎中曾肇為吏部郎以考功
 員外郎王子韶水部員外郎王諤並為郎中
 六月以通判潁昌府范純禮為戶部郎中以右司諫蹇
 序辰為司封員外郎

鈔本生

左僕射王公珪已未七月初九日生知樞密院韓公鎮
 同甲月日皆同惟時差異五月十八日王公薨後數日
 韓公拜右僕射陰陽家之說果可信邪

余奉使至雄州五月二十二日次白溝驛是日晚雨雹其大如拳屋瓦多碎彼人云歲常如此尤有甚於此者目所未覩也

司馬公光拜門下侍郎辭避甚確累遣御藥院近侍召受告身隻日特垂簾促令告謝押赴門下歸即歸私第又遣入內都都知張茂則宣召供職國朝故事惟宰相或間遣御藥院近臣傳旨都知累朝未嘗遣也召受告身隻日特開延和又遣都都知宣召皆非舊例恩禮之隆今昔絕擬

鈔本真

北人謂住坐處曰捺鉢四時皆然如春捺鉢之類是也不曉其義近者彼國中書舍人王師儒來修祭尊余充接伴使因以問師儒答云是契丹家語猶言行在也七月以資政殿大學士呂公著爲左丞自王安禮罷左丞久闕至此方有除授

初五日詣南郊請大行皇帝尊謚曰英文烈武聖孝廟曰神宗三省給諫侍郎已上學士待制御史中丞宗室正任團練使寺監長寄祿中散大夫已上並預焉

七月十六日太皇太后生辰上節名曰坤成有司檢討故事北朝當遣使人乾興元年章獻太后垂簾各遣生辰使人亦曾致書嘉祐二年虜母聽政真宗之妻於仁

鈔本宗真是也

宗皇帝為弟婦即難通問是時每遣國信使即致書洪基云請侍次聞達其回書亦洪基傳達母后之辭使者到彼國即洪基殿通書母后殿傳達遣使之語及致禮物當時以謂得禮今洪基英宗皇帝之弟也於太皇太后亦難通問朝廷方采用嘉祐故事無以易焉十四日北朝祭奠弔慰使副各素服詣皇儀殿行禮既畢百官立班殿門外進名奉慰云

以戶部侍郎李定為龍圖閣直學士知青州以寶文閣待制吳雍為戶部侍郎

梁沈約有修竹彈甘蕉文其畧曰渭川長兼淇園貞幹

露鈔本路

臣修竹稽首言切尋姑蘇臺前甘蕉一叢宿漸雲露荏

苒歲月今月某日有臺西階澤蘭萱草到園同訴自稱

今月某日巫岫歛雲秦樓開照乾光宏普固幽不矚而

甘蕉攢莖布影獨見鄣蔽雖處臺隅遂同幽谷臣謂偏

辭難信敢察以情登攝甘蕉左近杜若江蘺依源辨覆

兩草各處異列同欵既有證據差非風聞妨賢敗政孰

過於此而不除戮憲章安用請以見事徙根翦葉斥出

臺外庶懲彼將來謝此衆屈歷觀自昔文集未嘗有類

此製者雖曰新奇蓋亦有所寓託也

朝廷承五代之弊名式未正文德殿東西有上閣門而

無上閣按大唐宣政殿周之中朝也是謂正衙紫宸殿直其北是謂上閣蓋自晉太極殿有東西閣天子坐以聽政閣之名起於此方唐盛時立仗於宣政天子坐紫宸而金吾殿中細仗自東西上閣門入謂之喚仗今文德殿唐宣政正衙也而垂拱直其北紫宸乃在東偏文德殿東西但有上閣二門未審以何殿為上閣謂宜參詳典故正上閣之名以復有唐盛事焉

以知蔡州黃好謙為駕部郎中劉摯為秘書少監以都官郎中蒲宗閔為利州路轉運副使以知明州馬琬為都官郎中以左司郎中胡宗愈為起居郎以右司員外

劉摯工脫官名據上卷四曾為右司郎中

郎邢恕為起居舍人以吏部郎中張汝賢為右郎中

元豐八年七月御史臺班簿銀青光祿大夫二員光祿

大夫二員正議大夫六員通議大夫九員大中大夫四

員中大夫六十員朝散大夫七十三員朝奏大夫八十

七員朝請郎一百二十一員朝散郎二百一十四員朝

奉郎三百八十四員承議郎三百六十七員奉議郎四

百八十九員通直郎二百三十五員分司官四十員宣

德郎二百三十八員宣義郎一百一十四員承事郎一

百三員承奉郎一百五十七員承務郎一百一員內外

共一千八百餘員近者登極覃恩各有遷改其多如此

然舊數亦依約可見也

史記季布傳楚人曹止生招權顧金錢事貴人趙同等漢書同作談司馬遷以父名故改之今人與父同名者改曰同為是也

唐慈恩題名按劉公嘉話錄起自進士張莒於長安慈恩寺開遊題其姓名於塔下後書之於板遂為故事本朝進士題名皆刻石於相國興國兩寺亦慈恩之比也

梁四公子一人姓蜀音攜名闖萬禁反孫原人一人姓駝音萬

名杰音傑天齊人一人姓麤音蜀名曠音湍浩灋人一人姓仇

音掌名啓五阮人昭明太子曰蜀出揚雄蜀記闖出公羊

傳駝出世本字亦作簡出三齊記杰出竹書紀年麤出

索緯隴西人物志曠出世本及廣雅仇出太乙符脊出

史記孫原棘山名浩灋洮湟之間二水名五阮雁門也

浩音告灋音門今俗呼為閤門河蓋疾言之

告為閤耳

吏部西選一曰尚書左選京朝官三千餘員二曰尚書

右選大使臣一千九百餘員三曰侍郎左選幕職令錄

判司簿尉四千餘員四曰侍郎右選小使臣一萬三十

餘員四選除非次闕外例多待闕及二年者員多闕少

之弊也



P8

唐制天子坐朝宮人引至殿上故杜甫詩云戶外昭容
紫袖垂雙瞻御坐引朝儀天祐二年十二月詔曰宮妃
女職本備內任今後每遇延英坐日只令小黃門祇候
引從宮人不得出內自此始罷也

今三省官諫議大夫司諫正言郎中方出入重戴蓋昔
者門下中書省自侍郎常侍給舍諫議至起居遺補尚
書省自尚書丞郎至正郎皆重戴是為清望官唯員外
郎不得預此御史臺至今自中丞監察皆重戴獨此為
是耳三省皆非故事也

周顯德六年高麗遣使獻別叙孝經一卷越五孝經新
竹之妃後唐武皇師還渭北不獲入覲幙客李龔吉作
違離表云六禽有翼聽舜樂以猶來天路無梯望堯雲
而不到五代之季工翰墨者無以過此也

戊午臘月國維復讀一過訂正十餘字

庚申六月朔又讀一過訂正十餘字

辛酉穀日以南林蔣氏藏舊鈔本校前所校正處舊鈔多不誤又增改數十字足
為善本矣 國維 舊鈔本有秀水朱氏潛采堂圖書一印

文昌雜錄卷第六終

文目録

九

文目録



